

詩經寶笈

法海寶筏序

竊惟覺皇以一大事因緣出現于世垂示三乘頓漸之旨四十九年之所宣說流傳震丹爲五千餘卷良由根性萬差方便多門祇爲淘洗積習之業根克復具有之德相而都無實法迺義學之徒專尚知解尋行數墨真可憐愍暨達磨西來不立文字直指人心惟可大師禮拜依位而立竟證得髓之果夫世尊拈花飲光微笑正法眼藏展轉相授者此而嗣後歷代宗師拈椎豎拂舞筇擎鉢之公案卽先聖軌範也噫禪是佛心教是佛語禪教何嘗有歧然後來修行之

人自相矛盾良可慨矣蓮舫道人早慕禪悅悟解超逸志切兼利裒輯諸祖論心之要籤曰法海寶筏將欲印布蓋法者恒沙性德皆可軌持海者廣博深奧含藏無量寶者教理行果佳世不滅而期到彼岸藉此可達謂之筏顧余淺陋無所發明畧綴自古禪教分宗之槩恐未知能契佛祖心可合道人命名義耶

嘆

太湖三萬六千頃月在波心說向誰

光緒癸未孟秋孟蘭會日葆光居士劉雲薰沐謹識

蘇州費皇以一大事因緣出興于世垂示三乘
法寶外

法海寶筏目錄

觀心論

初祖達磨

血脈論

初祖達磨

信心銘

三祖僧璨

最上乘論

五祖弘忍

傳心法要

黃檗斷際

宛陵錄

黃檗斷際

真心直說

高麗普照

修心訣

高麗普照

禪警語

博山無異

法海寶筏目錄終

法海寶筏

觀心論 初祖達摩大師說

惠可問曰若有人志求佛道當修何法最爲省要師
答曰唯觀心一法摠攝諸行名爲省要

問曰云何一法摠攝諸行師答曰心者萬法之根本
也一切諸法唯心所生若能了心萬行俱備猶如大
樹所有枝條及諸花果皆悉因根栽樹者存根而始
生伐樹者去根而必死若了心修道則省功而易成
若不了心而修道乃費功而無益故知一切善惡皆
由自心心外別求終無是處

又問曰云何觀心稱之爲了答曰菩薩摩訶薩行深般若波羅蜜多時了四大五蘊本空無我了見自心起用有二種差別云何爲二一者淨心二者染心其淨心者卽是無漏真如之心其染心者卽是有漏無明之心此二種心自然本來俱有雖假緣和合互不相生淨心恒樂善因染心常思惡業若真如自覺覺不受所染則稱之爲聖遂能遠離諸苦證涅槃樂若隨染造惡受其纏覆則名之爲凡於是沉淪三界受種種苦何以故由彼染心障真如體故十地經云衆生身中有金剛佛性猶如日輪體明圓滿廣大無邊

只爲五陰黑雲所覆猶如瓶內燈光不能顯現又涅槃經云一切衆生皆有佛性無明覆故不得解脫佛性者覺也但能自覺覺智明了離其所覆則名解脫故知一切諸善以覺爲根因其覺根遂能顯現諸功德樹涅槃之菓由此而成如是觀心可名爲了

又問曰上說真如佛性一切功德因覺爲根未審無明之心一切諸惡以何爲根答曰無明之心雖有八萬四千煩惱情欲恒沙衆惡無量無邊取要言之皆因三毒以爲根本其三毒者卽貪嗔癡也此三毒心自然本來具有一切諸惡猶如大樹根雖是一所生

枝葉其數無邊彼三毒根一一根中生諸惡業百千萬億倍過於前不可爲喻如是三毒於一本體自爲三毒若應現六根亦名六賊六賊者卽六識也由此六識出入諸根貪着萬境然成惡業障真如體故名六賊一切衆生由此三毒及以六賊惑亂身心沉淪生死輪迴六趣受諸苦惱猶如江河因小泉源涓流不絕乃能彌漫波濤萬里若復有人斷其根源則衆流皆息求解脫者能轉三毒爲三聚淨戒能轉六賊爲六波羅蜜自然永離一切諸苦

又問曰三毒六賊廣大無邊若唯觀心云何免彼無

窮之苦答曰三界業報唯心所生若能了心於三界中則出三界其三界者則三毒也貪爲欲界嗔爲色界癡爲無色界由此三毒心結集諸惡業報成就輪迴六趣故名爲三界又三毒造業輕重受報不同分歸六處故名六趣

又問曰云何輕重分之爲六答曰若有衆生不了正因迷心修善未免三界生三輕趣云何三輕所謂迷修十善妄求快樂未免貪界生於天趣迷持五戒妄起愛憎未免嗔界生於人趣迷執有爲信邪求福未免癡界生於修羅趣如是三類名爲三輕趣云何三

重所謂縱三毒心唯造惡業墮三重趣若貪業重者
墮餓鬼趣嗔業重者墮地獄趣癡業重者墮畜生趣
如是三重通前三輕遂成六趣故知惡業由自心生
但能攝心離諸邪惡三界六趣輪迴之苦自然消滅
能盡諸苦則名解脫

又問曰如佛所說我於阿僧祇劫無量勤苦方成佛
道云何今說唯除三毒則名解脫答曰佛所說言無
虛妄也阿僧祇者卽三毒心也胡名阿僧祇漢言不
可數此心中有恒沙惡念一一念中皆有一劫恒沙
者不可數也以毒惡念如恒沙故言不可數真如之

性既被三毒之所覆若不超彼恒河沙惡之念云何
名解脫今者能除貪嗔癡等三毒心是則名爲度得
三大阿僧祇劫末世衆生愚癡鈍根不解如來甚深
妙義三阿僧祇秘密之說遂言歷此塵劫方得成佛
末劫豈不疑誤修行之人退菩提道也

又問曰菩薩摩訶薩由持三聚淨戒行六波羅蜜方
成佛道今令學者唯持觀心不修戒行云何成佛答
曰三聚淨戒者則制三毒心也制一毒成無量善聚
者會也以能制三毒卽有三無量善普會於心名三
聚淨戒六波羅蜜者卽淨六根胡名波羅蜜漢言達

彼岸以六根清淨不染世塵卽是出煩惱便至彼岸也故名六波羅蜜

又問曰如經所說三聚淨戒者誓斷一切惡誓修一切善誓度一切衆生今者唯言制三毒心豈不文義有所乖也答曰佛所說經是真實語應無謬也菩薩摩訶薩於過去因中修菩薩行時爲對三毒發三誓願持三聚淨戒常修戒對貪毒誓斷一切惡故常修定對瞋毒誓修一切善故常修慧對癡毒誓度一切衆生故由持如是戒定慧等三種淨法故超彼三毒惡業成佛道也以能制三毒卽諸惡消滅故名之爲

斷以能持三聚淨戒卽諸善具足故名之爲修以能
斷惡修善則萬行成就自他俱利普濟羣生故名之
爲度故知所修戒行不離於心若自心淨一切衆生
皆悉清淨故經云心垢卽衆生垢心淨卽衆生淨又
云欲淨佛土先淨其心隨其心淨則佛土淨若能制
得三種毒心三聚淨戒自能成就

又問曰如經所說六波羅蜜者亦名六度所謂布施
持戒忍辱精進禪定智慧今言六根清淨名爲六波
羅蜜者若爲通會又度者其義云何答曰欲修六度
當淨六根欲淨六根先降六賊能捨眼賊離諸色境

心無固恡名爲布施能禁耳賊於彼聲塵不令縱逸
名爲持戒能伏鼻賊等諸香臭自在調柔名爲忍辱
能制舌賊不貪邪味讚詠講說無疲厭心名爲精進
能伏身賊於諸觸欲湛然不動名爲禪定能調意賊
不順無明常修覺慧樂諸功德名爲智慧又度者運
也六波羅蜜喻若船筏能運衆生達彼岸故云六度
又問曰經文所說釋迦如來爲菩薩時曾飲三斗六
升乳麋方成佛道卽先因食乳後證佛果豈唯觀心
得解脫也答曰誠如所說無虛妄也必因食乳然始
成佛佛所說食乳者非是世間不淨之乳乃是真如

清淨法乳三斗者卽三聚淨戒六升者六波羅蜜佛
成道時由食此清淨法乳方證佛果若言如來食於
世間姪欲和合不淨羶腥之乳者豈不成謗之甚乎
如來者自是金剛不壞無漏法身永離世間諸苦豈
須如是不淨之乳以免飢渴也如經所說此牛不在
高原不在下濕不食粟麥糠粃不與特牛同羣其牛
身作紫摩金色言此牛者則毗盧遮那佛也以大慈
悲憐愍一切故於清淨法體中流出如是三聚淨戒
六波羅蜜微妙法乳乳養一切求解脫者飲如是清
淨之牛清淨之乳非獨如來飲之成道一切衆生若

能飲者皆得成阿耨多羅三藐三菩提

又問曰佛說經中令衆生修造伽藍鑄寫形像燒香散花燃長明燈日夜六時行道持齋禮拜種種功德皆成佛道若唯觀心揔攝諸行說如是事應虛妄也答曰佛所說經有無量方便以一切衆生鈍根狹劣不悟甚深之義所以假有爲事喻無爲理若復不修內行唯只外求希望獲福無有是處言伽藍者梵音此言清淨處也若永除三毒常淨六根身心湛然內外清淨是則修伽藍也又鑄寫形像者卽一切衆生求佛道也所謂修諸覺行假像如來真容妙相豈道

鑄金銅之所作也是故求解脫者以身爲爐以法爲火以智慧爲工匠三聚淨戒六波羅蜜以爲摸樣鎔鍊身中真如佛性遍入一切戒律摸中如教奉行一無缺漏自然成就真容之相所謂究竟常住微妙法身非是有爲敗壞之法若人求道不解鑄寫真容憑何輒言成功德也燒香者亦非世間有相之香乃是無爲正法之香薰諸臭穢斷無明惡業悉令消滅其正法香有五種一者戒香所謂能斷諸惡能修諸善二者定香所謂深信大乘心無退轉三者慧香所謂常於身心內外觀察四者解脫香所謂能斷一切無

明結縛五者解脫知見香所謂覺察常明通達無礙如是五香名最上香世間無比佛在世日令諸弟子以智慧火燒如是无價寶香供養十方一切諸佛今時衆生愚癡鈍根不解如來真實之義唯將外火燒於世間沉檀薰陸質礙之香希望福報云何可得又散花者義亦如是所謂演說正法諸功德花饒益有情散治一切真如之性普施莊嚴此功德花佛所稱歎究竟常住無凋落期若復有人散如是花獲福無量若言如來令諸弟子及衆生等剪裁豔綵傷損草木以爲散花無有是處所以者何持淨戒者於諸天

地森羅萬像不令觸犯悞損者由獲大罪况復今者
加毀淨戒傷損萬物求於福報欲益反損豈有是乎
又長明燈者正覺心也覺知明了喻之爲燈是故一
切求解脫者常以身爲燈臺心爲燈盞信爲燈炷增
諸戒行以爲添油智慧明達喻如燈光常然如是覺
燈炤破一切無明癡暗能以此法轉相開悟卽是一
燈然百千燈以燈續明終無盡故故號長明過去有
佛名曰然燈義亦如是愚癡衆生不會如來方便之
說專行虛妄執着有爲遂然世間蘇油之燈以炤空
室乃稱依教豈不謬乎所以者何佛放眉間一毫之

光尙照十萬八千世界若身光盡現則普照十方豈
假如是世俗之燈以爲利益審察斯理應不然乎又
六時行道者所謂六根之中於一切時常行佛道佛
者覺也卽時修諸覺行調伏六根六情清淨長時不
捨名爲六時行道塔者身心也常令覺慧巡遶身心
念念不停名爲遶塔過去諸聖曾行此道得涅槃樂
今時世人求解脫者不會斯理何名行道竊見今時
鈍根之輩曾不內行唯執外求將質礙身遶世間塔
日夜走驟徒自疲勞而於真性一無利益迷愚之輩
甚誠可愍歟又持齋者當須會意不達其理徒施虛

功齋者齊也所謂勤治身心不令散亂持者護也所謂於諸戒行如法護持必須禁六情制三毒勤修覺察清淨身心了如是義可名爲齋又持齋者食有五種一者法喜食所謂依如來正法歡喜奉行二者禪悅食所謂內外澄寂身心悅樂三者念食所謂常念諸佛心口相應四者願食所謂行住坐臥常行善願五者解脫食所謂心常清淨不染世塵持五淨食者名爲齋食若復有人不食如是五種淨食自言持齋無有是處又有斷食言斷食者斷無明惡業之食若輒觸者名爲破齋齋若有破云何獲福世有迷愚不

悟斯理身心放逸造諸惡業貪恣欲情不生慙愧唯
斷外食自爲持齋何異癡兒見爛壞死屍稱言有命
必無是處又禮拜者常如法也必須理體內明事相
外變理不可捨事有行藏會如是義乃名依法夫禮
者敬也拜者伏也所謂恭敬真性屈伏無明名爲禮
拜以恭敬故不敢毀傷以屈伏故無令縱逸若能惡
情永滅善念恒存雖不現相常爲禮拜其相者則身
相也欲爲令諸世俗表見下心故須屈伏外身視恭
敬相用之則現捨之則藏舉外明內性相應也若復
不行理法唯執外問內則迷故縱於貪嗔癡常爲惡

業外則空顯身相何名禮拜無慙於聖故誑凡不免輪墮豈成功德既無所得云何求道

又問曰如溫室經說洗浴衆僧得福無量此則憑何事法功德始成若唯觀心可相應不答曰洗浴衆僧者非說世間有爲事也世尊當爾爲諸弟子說溫室經欲令受持洗浴之法是故假諸世事譬喻真宗隱說七事供養功德其七事者一者淨水二者燃火三者澡豆四者楊枝五者淨灰六者酥膏七者內衣舉此七事喻於七法一切衆生用此七法沐浴莊嚴能除三毒無明垢穢其七法者一者法戒洗溫慙非僧

如淨水去諸塵垢二者智慧觀察內外猶如燃火能
溫淨水三者分別揀棄諸惡猶如澡豆能淨垢膩四
者真實斷諸妄語猶如楊枝能消口氣五者正信決
意無慮猶如淨灰摩身能辟諸風六者調息柔軟伏
諸剛強猶如酥膏通潤皮膚七者慚愧悔諸惡業猶
如內衣遮蔽醜形以上七事並是經中秘密之藏如
來當爾爲諸大乘利根者說非爲小乘智淺下劣者
凡夫所說以今人無能悟解其溫室者則身是也所
以然智慧火溫淨戒湯沐浴身中真如佛性受持七
法以自莊嚴當爾比丘聰明利智皆悟聖意如說修

行功德成就俱登聖果今時衆生愚癡鈍根莫測斯
事將世間水洗質碍身自言依教豈非誤也且真如
佛性非是凡形煩惱塵垢本來無相豈可將有碍水
洗無明身事不相應云何悟道若言碍身得清淨者
常觀此身本因貪欲不淨所生臭穢駢闐內外充塞
若洗此身求於淨者猶如洗泥終無得淨如此驗之
明知外洗非佛說也

又問曰經所說言志心念佛必得往生西方淨土以
此妙門則應成佛如何觀心求於解脫答曰夫念佛
者當修正念了義爲正不了義爲邪正念必得西方

邪念云何達彼佛者覺也所謂覺察身心勿令起惡
念者憶也所謂憶持戒行不忘精勤了如是義名爲
正念故知念在於心不在言也因筌求魚得魚忘筌
因言得意得意忘言旣稱念佛之名須行念佛之體
若念無實體口誦空名徒自虛功有何成益且如誦
之與念名義懸殊在口曰誦在心曰念故知念從心
起名爲覺行之門誦在口中卽是音聲之相執相求
福終無是乎故經云凡所有相皆是虛妄又云若以
色見我以音聲求我是人行邪道不能見如來以此
觀之乃知事相非真正也故知過去諸聖所修功德

皆非外說唯只論心心是衆聖之源心爲萬惡之主
涅槃常樂由自心生三界輪迴亦從心起心爲出世
之門戶心是解脫之關津知門戶者豈慮難成識關
津者何憂不達竊見今時淺識唯知立相爲功廣費
財寶多傷水陸妄營像塔虛役人功積木壘泥塗青
畫緣傾心盡力損已迷他未解慙愧何曾覺悟見有
爲則勤勤愛着說無相卽兀兀如迷且貪世上之小
樂不覺當來之大苦此之修學徒自疲勞背正歸邪
誑言獲福但能攝心內照覺觀常明絕三毒心永使
消亡閉六賊門不令侵擾自恒沙功德種種莊嚴無

量法門一一成就超凡證聖目擊非遙悟在須臾何
煩皓首真門幽秘寧可具陳畧說觀心詳其小分

法海寶筏

血脉論 初祖達摩大師說

三界混起同歸一心前佛後佛以心傳心不立文字
問曰若不立文字以何爲心答曰汝問吾卽是汝心
吾答汝卽是吾心吾若無心因何解答汝汝若無心
因何解問吾問吾卽是汝心從無始曠大劫以來乃
至施爲運動一切時中一切處所皆是汝本心皆是
汝本佛卽心是佛亦復如是除此心外終無別佛可
得離此心外覓菩提涅槃無有是處自性真實非因
非果法卽是心義自心是菩提自心是涅槃若言心

外有佛及菩提可得無有是處佛及菩提皆在何處
譬如有人以手捉虛空得否虛窮但有名亦無相貌
取不得捨不得是捉空不得除此心外覓佛終不得
也佛是自心作得因何離此心外覓佛前佛後佛只
言其心心卽是佛佛卽是心心外無佛佛外無心若
言心外有佛佛在何處心外旣無佛何起佛見遞相
誑惑不能了本心被他無情物攝無自由若也不信
自誑無益佛無過患衆生顛倒不覺不知自心是佛
若知自心是佛不應心外覓佛佛不度佛將心覓佛
不識佛但是外佛者盡是不識自心是佛亦不得將

佛禮佛不得將心念佛佛不誦經佛不持戒佛不犯
戒佛無持犯亦不造善惡若欲覓佛須是見性卽是
佛若不見性念佛誦經持齋持戒亦無益處念佛得
因果誦經得聰明持戒得生天布施得福報覓佛終
不得也若自己不明瞭須叅善知識了却生死根本
若不見性卽不名善知識若不如是縱說得十二部
經亦不免生死輪迴三界受苦無出期時昔有善星
比丘誦得十二部經猶自不免輪迴緣爲不見性善
星旣如此今時人講得三五本經論以爲佛法者愚
人也若不識得自心誦得閑文書都無用處若要覓

佛直須見性性卽是佛佛卽是自在人無事無作人
若不見性終日茫茫向外馳求覓佛元來不得雖無
一物可得若未會亦須叅善知識切須苦求令心會
解生死事大不得空過自誑無益縱有珍寶如山眷
屬如恒河沙開眼卽見合眼還見麼故知有爲之法
如夢幻等若不急尋師空過一生然卽佛性自有若
不因師終不明了不因師悟者萬中希有若自己以
緣會合得聖人意卽不用叅善知識此卽是生而知
之勝學也若未悟解須勤苦叅學因教方得悟若自
明了不學亦得不同迷人不能分別皂白妄言宣佛

勅謗佛妄法如斯等類說法如雨盡是魔說卽非佛
說師是魔王弟子是魔民迷人任他指揮不覺墮生
死海但是不見性人妄稱是佛此等衆生是大罪人
誑他一切衆生令入魔界若不見性說得十二部經
教盡是魔說魔家眷屬不是佛家弟子旣不辨皂白
憑何免生死若見性卽是佛不見性卽是衆生若離
衆生性別有佛性可得者佛今在何處卽衆生性卽
是佛性也性外無佛佛卽是性除此性外無佛可得
佛外無性可得

問曰若不見性念佛誦經布施持戒精進廣興福利

得成佛否答曰不得

又問因何不得答曰有少法可得是有爲法是因果是受報是輪迴法不免生死何時得成佛道成佛須是見性若不見性因果等語是外道法若是佛不習外道法佛是無業人無因果但有少法可得盡是謗佛憑何得成但有住着一心一解一見佛都不許佛無持犯心性本空亦非垢淨諸法無修無證無因無果佛不持戒佛不修善佛不造惡佛不精進佛不懈怠佛是無作人但有住着心見佛卽不許也佛不是佛莫作佛解若不見此義一切時中一切處所

皆是不了本心若不見性一切時中擬作無作想是大罪人是癡人落無記空中昏昏如醉人不辨好惡若擬修無作法先須見性然後息緣慮若不見性得成佛道無有是處有人撥無因果熾然作惡業妄言本空作惡無過如此之人墮無間黑闇地獄永無出期若是智人不應如是見解

問曰旣若施爲運動一切時中皆是本心色身無常之時云何不見本心答曰本心常現前汝自不見問曰心旣見在何故不見師云汝曾作夢否答曰曾作夢

問曰汝作夢之時是汝本身否答曰是本身

又問汝言語施爲運動以汝別不別答曰不別師云
旣若不別卽此身是汝本法身卽此法身是汝本心
此心從無始廣大劫來與如今不別未曾有生死不
生不滅不增不減不垢不淨不好不惡不來不去亦
無是非亦無男女相亦無僧俗老少無聖無凡亦無
佛亦無衆生亦無修證亦無因果亦無筋力亦無相
貌猶如虛空取不得捨不得山河石壁不能爲礙出
沒往來自在神通透五蘊山渡生死河一切業拘此
法身不得此心微妙難見此心不同色相此心是人

皆欲得見於此光明中運手動足者如恒河沙及乎問着揔道不得猶如木人相似揔是自己受用因何不識佛言一切衆生盡是迷人因此作業墮生死河欲出還沒只爲不見性衆生若不迷因何問着其中無有一人得會者自家運手動足因何不識故知聖人語不錯迷人自不會曉故知此難明惟佛一人能會此法餘人天及衆生等盡不明了若智慧明了此心方名法性亦名解脫生死不拘一切法拘他不得是名大自在王如來亦名不思議亦名聖體亦名長生不死亦名大仙名雖不同體卽是一聖人種種分

明皆不離自心心量廣大應用無窮應眼見色應耳聞聲應鼻嗅香應舌知味乃至施爲運動皆是自心一切時中但有語言道斷卽是自心故云如來色無盡智慧亦復然色無盡是自心心識善能分別一切乃至施爲運用皆是智慧心無形相智慧亦無盡故云如來色無盡智慧亦復然四大色身卽是煩惱色身卽有生滅法身常住無所住如來法身常不變異故經云衆生應知佛性本身有之迦葉只是悟得本性本性卽是心心卽是性卽此同諸佛心前佛後佛只傳此心除此心外無佛可得顛倒衆生不知自心

是佛向外馳求終日忙忙念佛禮佛佛在何處不應
作如是等見但識自心心外更無別佛經云凡所有
相皆是虛妄又云所生之處卽爲有佛自心是佛不
應將佛禮佛但是有佛及菩薩相貌忽爾見前切不
用禮敬我心空寂本無如是相貌若取相卽是魔盡
落邪道若是幻從心起卽不用禮禮者不知知者不
禮禮被魔攝恐學人不知故作是辨諸佛如來本相
體上都無如是相貌切須在意但有異境界切不用
採括亦莫生怕怖不要疑惑我心本來清淨何處有
如許相貌乃至天龍夜叉鬼神帝釋梵王等相亦不

用心生敬重亦莫怕懼我心本來空寂一切相貌皆是妄相但莫取相若起佛見法見及佛菩薩等相貌而生敬重自墮衆生位中若欲真會但莫取一切相卽得更無別語故經云凡所有相皆是虛妄都無定實幻無定相是無常法但不取相合他聖意故經云離一切相卽名諸佛

問曰因何不得禮佛菩薩等答曰天魔波旬阿修羅示見神通皆作得菩薩相貌種種變化是外道揔不是佛佛是自心莫錯禮拜佛是西國語此土云覺性是佛靈覺應機接物揚眉瞬目運手動足皆是自已

靈覺之性性卽是心心卽是佛佛卽是道道卽是禪
禪之一字非凡夫所測又云見本性爲禪若不見本
性卽非禪也假使說得千經萬論若不見本性只是
凡夫非是佛法至道幽深不可話會典教憑何所及
但見本性一字不識亦得見性卽是佛聖體本來清
淨無有雜穢所有言說皆是聖人從心起用用體本
來空名言尙不及十二部經憑何得及道本圓成不
用修證道非聲色微妙難見如人飲水冷暖自知不
可向人說也唯有如來能知餘人天等類都不覺知
凡夫智不及所以有執相不了自心本來空寂妄執

相及一切法卽墮外道若知諸法從心生不應有執
執卽不知若見本性十二部經摠是閑文字千經萬
論只是明心言下契會教將何用至理絕言教是語
詞實不是道道本無言言說是妄若夜夢見樓閣宮
殿象馬之屬及樹木叢林池亭如是等相不得起一
念樂着盡是托生之處切須在意臨終之時不得取
相卽得除疑心瞥起卽魔攝法身本來清淨無受只
緣迷故不覺不知因茲故妄受報所以有樂着不得
自在只今若悟得本來身心卽不染習若從聖入凡
示見種種雜類等自爲衆生故聖人逆順皆得自在

一切業拘他不得聖成久有大威德一切品類業被
他聖人轉天堂地獄無奈何他凡夫神識昏昧不同
聖人內外明徹若有疑卽不作作卽流浪生死後悔
無相救處貧窮困苦皆從妄相生若了是心遞相勸
勉但無作而作卽入如來知見初發心人神識摠不
定若夢中頻見異境輒不用疑皆是自心起故不從
外來夢若見光明出現過於日輪卽餘習頓盡法界
性見若有此事卽是成佛之因唯自知不可向人說
或靜園林中行住坐臥眼見光明或大或小莫與人
說亦不得取亦是自性光明或夜靜暗中行住坐臥

眼見光明與晝無異不得怪並是自心欲明顯或夜
夢中見星月分明亦自心諸緣欲息亦不得向人說
夢若昏昏猶如陰暗中行亦是自心煩惱障重亦自
知若見本性不用讀經念佛廣學多知無益神識轉
昏設教只爲標心若識心何用看教若從凡入聖卽
須息業養神隨分過日若多嗔喜令性轉與道相違
自賺無益聖人於生死可自在出沒隱顯不定一切
業拘他不得聖人破邪魔一切衆生但見本性餘習
頓滅神識不昧須是直下便會只在如今欲真會道
莫執一法息業養神餘習亦盡自然明白不假用功

外道不會佛意用功最多違背聖意終日驅驅念佛
轉經昏於神性不免輪迴佛是閑人何用驅驅廣求
名利後時何用但不見性人讀經念佛長學精進六
時行道長學坐不臥廣學多聞以爲佛法此等衆生
盡是謗佛法人前佛後佛只言見性諸行無常若不
見性妄言我得阿耨菩提此是大罪人十大弟子阿
難聲聞中得第一佛無識只令聲聞二乘外道無識
識數修證墮在因果中是衆生業報不免生死違背
佛意卽是謗佛衆生殺却無罪過經云闡提人不生
信心殺却無罪過若有信心此人是佛位人若不見

性卽不用取次謗他良善自賺無益善惡歷然因果
分明天堂地獄只在眼前愚人不信見墮黑暗地獄
中亦不覺不知只緣業重故所以不信譬如無目人
不信道有光明縱向伊說亦不信只緣盲故憑何辨
得日光愚人亦復如是見今墮畜生雜類誕在貧窮
下賤求生不得求死不得雖受是苦直問著亦言我
今快樂不異天堂故知一切衆生生處爲樂亦不覺
不知如斯惡人只緣業障重故所以不能發信心者
不自由他也若見自心是佛不在剷除鬚髮白衣亦
是佛若不見性剷除鬚髮亦是外道

問曰白衣有妻子姪慾不除憑何得成佛答曰只言見性不言姪慾只爲不見性但得見性姪慾本來空寂不假斷除亦不樂著縱有餘習不能爲害何以故性本清淨故雖處在五蘊色身中其性本來清淨染污不得法身本來無受無飢無渴無寒熱無病無恩愛無眷屬無苦樂無好惡無長短無強弱本來無有一物可得只緣有此色身因卽有飢渴寒熱瘴病等相若不賺卽一任作若於生死中得自在轉一切法與聖人神通自在無礙無處不安若心有疑決定透一切境界不過不作最好作了不免輪迴生死若見

性旃陀羅亦得成佛

問曰旃陀羅殺生作業如何得成佛答曰只言見性不言作業縱作業不同一切業拘不得從無始曠大劫來只爲不見性墮地獄中所以作業輪迴生死從悟得本性終不作業若不見性念佛免報不得非論殺生命若見性疑心頓除殺生命亦不奈他何自西天二十八祖只是遞傳心印吾今來此土唯傳頓教大乘卽心是佛不言持戒精進苦行乃至入水火登於劒輪一食長坐不臥盡是外道有爲法若識得施爲運動靈覺之性汝卽諸佛心前佛後佛只言傳心

更無別法若識此法凡間一字不識亦是佛若不識
自己靈覺之性假使身破如微塵覓佛終不得也佛
者亦名法身亦名佛心此心無形相無因果無筋骨
猶如虛空取不得不同質界不同外道此心除如來
一人能會其餘衆生迷人不明了此心不離四大色
身中若離是心卽無能運動是身無知如草木瓦礫
身是無情因何運動若自心動乃至語言施爲運動
見聞覺知皆是動心動用動是心動動卽其用動用
外無心心外無動動不是心心不是動動本無心心
本無動動不離心心不離動無心離離無心動動是

心用用是心動動卽心用用卽心用不動不用用
體本空空本無動動用同心心本無動故經云動而
無所動終日去來而未曾去終日見而未曾見終日
笑而未曾笑終日聞而未曾聞終日知而未曾知終
日喜而未曾喜終日行而未曾行終日住而未曾住
故經云言語道斷心行處滅見聞覺知本自圓寂乃
至嗔喜痛痒何異木人只緣推尋痛痒不可得故經
云惡業卽得苦報善業有善報不但嗔墮地獄喜卽
生天若知嗔喜性空但不執卽業脫若不見性講經
決無憑說亦無盡畧標邪正如是不及一一也

頌曰

心心心難可尋寬時遍法界窄也不容鍼我本求心
不求佛了知三界空無物若欲求佛但求心只這心
心心是佛我本求心心自持求心不得待心知佛性
不從心外得心生便是罪生時

偈曰

吾本來此土 傳法救迷情
一花開五葉 結果自然成

法海寶筏

信心銘 三祖僧璨大師說

至道無難唯嫌揀擇但莫憎愛洞然明白毫釐有差
天地懸隔欲得現前莫存順逆違順相爭是爲心病
不識玄旨徒勞念靜圓同太虛無欠無餘良由取捨
所以不如莫逐有緣勿住空忍一種平懷泯然自盡
止動歸止止更彌動唯滯兩邊寧知一種一種不通
兩處失功遣有沒有從空背空多言多慮轉不相應
絕言絕慮無處不通歸根得旨隨照失宗須臾返照
勝却前空前空轉變皆由妄見不用求真唯須息見

二見不住慎莫追尋纔有是非紛然失心二由一有
一亦莫守一心不生萬法無咎無咎無法不生不心
能由境滅境逐能沉境由能境能由境能欲知兩段
元是一空一空同兩齊含萬象不見精麤寧有偏黨
大道體寬無易無難小見狐疑轉急轉遲執之失度
必入邪路放之自然體無去住任性合道逍遙絕惱
繫念乖真昏沉好不好不好勞神何用疎親欲取一乘
勿惡六塵六塵不惡還同正覺智者無爲愚人自縛
法無異法妄自愛著將心用心豈非大錯迷生寂亂
悟無好惡一切二邊浪由斟酌夢幻空花何勞把捉

得失是非一時放却眼若不睡諸夢自除心若不異
萬法一如一如體玄兀爾忘緣萬法齊觀歸復自然
泯其所以不可方比止動無動動止無止兩旣不成
一何有爾究竟窮極不存軌則契心平等所作俱息
狐疑盡淨正信調直一切不留無可記憶虛明白照
不勞心力非思量處識情難測真如法界無他無自
要急相應唯言不二不二皆同無不包容十方智者
皆入此宗宗非促延一念萬年無在不在十方目前
極小同大志絕境界極大同小不見邊表有卽是無
無卽是有若不如是必不須守一卽一切一切卽一

但能如是何慮不畢信心不二不二信心言語道斷
非去來今

法海寶筏

最上乘論 五祖弘忍大師說

凡趣聖道悟解真宗修心要論若其不護淨者一切
行無由取見願善知識如有寫者用心無令脫錯恐
誤後人

夫修道之本體須識當身心本來清淨不生不滅無
有分別自性圓滿清淨之心此是本師乃勝念十方
諸佛

問曰何知自心本來清淨答曰十地經云衆生身中
有金剛佛性猶如日輪體明圓滿廣大無邊只爲五

陰黑雲之所覆如瓶內燈光不能照輝譬如世間雲霧八方俱起天下陰闇日豈爛也何故無光光元不壞只爲雲霧所覆一切衆生清淨之心亦復如是只爲攀緣妄念煩惱諸見黑雲所覆但能凝然守心妄念不生涅槃法自然顯現故知自心本來清淨

問曰何知自心本來不生不滅答曰維摩經云如無有生如無有滅如者真如佛性自性清淨清淨者心之原也真如本有不從緣生又云一切衆生皆如也衆賢聖亦如也一切衆生者卽我等是也衆賢聖者卽諸佛是也名相雖別身中真如法性並同不生不

滅故言皆如也故知自心本來不生不滅

問曰何名自心爲本師答曰此真心者自然而有不從外來不嚟束修於三世中所有至親莫過自守於心若識心者守之則到彼岸迷心者棄之則墮三塗故知三世諸佛以自心爲本師故論云了然守心則妄念不起則是無生故知心是本師

問曰何名自心勝念彼佛答曰常念彼佛不免生死守我本心則到彼岸金剛經云若以色見我以音聲求我是人行邪道不能見如來故云守本真心勝念他佛又云勝者只是約行勸人之語其實究竟果體

平等無二

問曰衆生與佛真體既同何故諸佛不生不滅受無量快樂自在無碍我等衆生墮生死中受種種苦耶
答曰十方諸佛悟達法性皆自然照燎於心源妄想不生正念不失我所心滅故得不受生死不生死故卽畢竟寂滅故知萬樂自歸一切衆生迷於真性不識心本種種妄緣不修正念故卽憎愛心起以憎愛故則心器破漏心器破漏故卽有生死有生死故則諸苦自現心王經云真如佛性沒在知見六識海中沉淪生死不得解脫努力會是守本真心妄念不生

我所心滅自然與佛平等無二

問曰真如法性同一無二迷應俱迷悟應俱悟何故
佛覺性衆生昏迷因何故然答曰自此已上入不思
議分非凡所及識心故悟失性故迷緣合卽合說不
可定但信真諦守自本心故維摩經云無自性無他
性法本無生今卽無滅此悟卽離二邊入無分別智
若解此義但於行知法要守心第一此守心者乃是
涅槃之根本入道之要門十二部經之宗三世諸佛
之祖

問曰何知守本真心是涅槃之根本答曰涅槃者體

法苑珠林卷之八
是寂滅無爲安樂我心既是真心妄想則斷妄想斷
故則具正念正念具故寂照智生寂照智生故窮達
法性窮達法性故則得涅槃故知守本真心是涅槃
之根本

問曰何知守本真心是入道之要門答曰乃至舉一
手爪畫佛形像或造恒沙功德者只是佛爲教道無
智慧衆生作當來勝報之業及見佛之因若願自早
成佛者會是守本真心三世諸佛無量無邊若有一
人不守真心得成佛者無有是處故經云制心一處
無事不辦故知守本真心是入道之要門也

問曰何知守本真心是十二部經之宗答曰如來於一切經中說一切罪福一切因緣果報或引一切山河大地草木等種種雜物起無量無邊譬喻或現無量神通種種變化者只是佛爲教導無智慧衆生有種種欲心心行萬差是故如來隨其心門引入一乘我旣體知衆生佛性本來清淨如雲底日但了然守本真心妄念雲盡慧日卽現何須更多學知見取生死苦一切義理及三世之事譬如磨鏡塵盡明自然現則今於無明心中學得者終是不堪若能了然不失正念無爲心中學得者此是真學雖言真學竟無

法華經疏
所學何以故我及涅槃二皆空故更無二無一故無
所學法性雖空要須了然守本真心妄念不生我所
心滅故涅槃經云知佛不說法者是名具足多聞故
知守本真心是十二部經之宗也

問曰何知守本真心是三世諸佛之祖答曰三世諸
佛皆從心性中生先守真心妄念不生我所心滅後
得成佛故知守本真心是三世諸佛之祖也上來四
種問答若欲廣說何窮吾今望得汝自識本心是佛
是故慫勸汝千經萬論莫過守本真心是要也吾
今努力按法華經示汝大輪寶藏明珠妙藥等物汝

自不取不服窮苦奈何會是妄念不生我所心滅一切功德自然圓滿不假外求歸生死苦於一切處正念察心莫愛現在樂種未來苦自誑誑他不脫生死努力努力今雖無常共作當來成佛之因莫使三世虛度枉死功夫經云常處地獄如遊園觀在餘惡道如已舍宅我等衆生今現如此不覺不知驚怖煞人了無出心奇哉苦哉若有初心學坐禪者依觀無量壽經端坐正念閉目合口心前平視隨意近遠作一日想守真心念念莫住卽善調氣息莫使乍麤乍細則令人成病苦夜坐禪時或見一切善惡境界或入

青黃赤白等諸三昧或見身出大光明或見如來身相或見種種變化但知攝心莫着並皆是空妄想而見也經云十方國土皆如虛空三界虛幻唯是一心作若不得定不見一切境界者亦不須恠但於行住坐臥中常了然守本真心會是妄念不生我所心滅一切萬法不出自心所以諸佛廣說如許多言教譬喻者只爲衆生行行不同遂使教門差別其實八萬四千法門三乘八道位體七十二賢行宗莫過自心是本也若能自識本心念念磨鍊莫住者卽自見佛性也於念念中常供養十方恒沙諸佛十二部經念

念常轉若了此心源者一切心義自現一切願具足一切行滿一切皆辦不受後有會是妄念不生我所心滅捨此身已定得無生不可思議努力莫造大如此真實不妄語難可得聞聞而能行者恒沙衆中莫過有一行而能到者億又劫中希有一人好好自安自靜善調諸根就視心源恒令照燎清淨勿令無記心生

問曰何名無記心答曰諸攝心人爲緣外境麤心小息內鍊真心心未清淨時於行住坐臥中恒微意看心猶未能了了清淨獨照心源是名無記心也亦是

漏心猶不免生死大病况復摠不守真心者是人沉
沒生死苦海何日得出可憐努力努力經云衆生若
情誠不內發者於三世縱值恒沙諸佛無所能爲經
云衆生識心自度佛不能度衆生若佛能度衆生者
過去諸佛恒沙無量何故我等不成佛也只是情誠
不自內發是故沉沒苦海努力努力勤求本心勿令
妄漏過去不知已過亦不及今身現在有遇得聞妙
法分明相觀決解此語了知守心是第一道不肯發
至誠心求願成佛受無量自在快樂乃始轟轟隨俗
貪求名利當來墮大地獄中受種種苦惱將何所及

奈何奈何努力努力但能着破衣殮麤殮了然守本
真心佯癡不解語最省氣力而能有功是大精進人
也世間迷人不解此理於無明心中多涉艱辛廣修
相善望得解脫乃歸生死苦了然不失正念而度衆
生者是大力菩薩分明語汝等守心第一若不勤學
者甚癡人也不肯現在一生忍若欲得當來萬劫受
殃聽汝更不知何囑八風吹不動者真是珍寶山也
若知果體者但對於萬境起恒沙作用巧辯若流應
病與藥而能妄念不生我所心滅者真是出世丈夫
如來在日歎何可盡吾說此言者至心勸汝不生妄

念我所心滅則是出世之士

問曰云何是我所心答曰爲有小許勝他之心自念我能如此者是我所心涅槃中病故涅槃經曰譬如虛空能容萬物而此虛空不自念言我能含容如是此喻我所心滅趣金剛三昧

問曰諸行人求真常寂者只樂世間無常麤善不樂第一義諦真常妙善其理未見只欲發心緣義遂思覺心起則是漏心只欲空心則是無明昏住又不當理只欲不止心不緣義卽惡取空雖受人身行畜生行爾時無有定慧方便而不能解了明見佛性只是

行人沉沒之處若爲超得到無餘涅槃願示真心答
曰會是信心具足志願成就緩緩靜心更重教汝好
自閑靜身心一切無所攀緣端坐正念善調氣息懲
其心不在內不在外不在中間好好如如穩看看熟
則了然此心識流動猶如水流陽焰曄曄不住旣見
此識時唯是不內不外緩緩如如穩看看熟則返覆
銷融虛凝湛住其此流動之識颯然自滅滅此識者
乃是滅十地菩薩衆中障惑此識滅已其心卽虛凝
寂淡泊皎潔泰然吾更不能說其形狀汝若欲得者
取涅槃經第三卷中金剛身品及維摩經第三卷見

阿閼佛品緩緩尋思細心搜檢熟看若此經熟實得
能於行住坐臥及對五欲八風不失此心者是人梵
行已立所作已辦究竟不受生死之身五欲者色聲
香味觸八風者利衰毀譽稱譏苦樂此是行人磨鍊
佛性處甚莫惟今身不得自在經云世間無佛住處
菩薩不得現用要脫此報身衆生過去根有利鈍不
可判上者一念間下者無量劫若有力時隨衆生性
起菩薩善根自利利他莊嚴佛土要須了四依乃窮
實相若依文執則失真宗諸比丘等汝學他出家修
道此時出家出生死枷是名出家正念具足修道得

成乃至解身支節臨命終時不失正念卽得成佛弟子上來集此論者直以信心依文取義作如是說實非了了證知若乖聖理者願懺悔除滅若當聖道者廻施衆生願皆識本心一時成佛聞者努力當來成佛願在前度我門徒

問曰此論從首至末皆顯自心是道昧知果行二門是何門攝答曰此論顯一乘爲宗然其至意導迷趣解自勉生死乃能度人直言自利不說利他約行門攝若有人依文行者卽在前成佛若我誑汝當來墮十八地獄指天地爲誓若不信我世世被虎狼所食

法海寶筏

傳心法要

黃檗斷際禪師說

師謂休曰諸佛與一切衆生唯是一心更無別法此心無始已來不曾生不曾滅不青不黃無形無相不屬有無不計新舊非長非短非大非小超過一切限量名言蹤跡對待當體便是動念卽乖猶如虛空无有邊際不可測度唯此一心卽是佛佛與衆生更无別異但是衆生著相外求求之轉失使佛覓佛將心捉心窮劫盡形終不能得不知息念忘慮佛自現前此心卽是佛佛卽是衆生爲衆生時此心不減爲諸

佛時此心不添乃至六度萬行河沙功德本自具足
不假修添遇緣卽施緣息卽寂若不決定信此是佛
而欲著相修行以求功用皆是妄想與道相乖此心
卽是佛更無別佛亦無別心此心明淨猶如虛空无
一點相貌舉心動念卽乖法體卽爲著相無始已來
無著相佛修六度萬行欲求成佛卽是次第无始已
來无次第佛但悟一心更无少法可得此卽真佛佛
與衆生一心无异猶如虛空无雜无壞如大日輪照
四天下日昇之時明徧天下虛空不曾明日沒之時
暗徧天下虛空不曾暗明暗之境自相凌奪虛空之

性廓然不變佛及衆生心亦如此若觀佛作清淨光明解脫之相觀衆生作垢濁暗昧生死之相作此解者歷河沙劫終不得菩提爲著相故唯此一心更無微塵許法可得卽心是佛如今學道人不悟此心體便於心上生心向外求佛著相修行皆是惡法非菩提道供養十方諸佛不如供養一箇无心道人何故无心者无一切心也如如之體內如木石不動不搖外如虛空不塞不礙无能所无方所无相貌无得失趨者不敢入此法恐落空无棲泊處故望崖而退例皆廣求知見所以求知見者如毛悟道者如角文殊

當理普賢當行理者真空无礙之理行者離相无盡
之行觀音當大慈勢至當大智維摩者淨名也淨者
性也名者相也性相不異故號淨名諸大菩薩所表
者人皆有之不離一心悟之卽是今學道人向自
心中悟乃於心外著相取境皆與道背恒河沙者佛
說是沙諸佛菩薩釋梵諸天步履而過沙亦不喜牛
羊蟲蟻踐踏而行沙亦不怒珍寶馨香沙亦不貪糞
屎臭穢沙亦不惡此心卽無心之心離一切相衆生
諸佛更無差別但能無心便是究竟學道人若不直
下無心累劫修行終不成道被三乘功行拘繫不得

解脫然證此心有遲疾有聞法一念便得无心者有
至十信十住十行十迴向乃得无心者有至十地乃
得无心者長短得无心乃住更无可修可證實无所
得真實不虛一念而得與十地而得者功用恰齊更
無深淺祇是歷劫枉受辛勤耳造惡造善皆是著相
著相造惡枉受輪迴著相造善枉受勞苦揔不如言
下便自認取本法此法卽心心外無法此心卽法法
外無心心自無心亦無無心者將心無心心却成有
默契而已絕諸思議故曰言語道斷心行處滅此心
是本源清淨佛人皆有之蠢動含靈與諸佛菩薩一

體不異祇爲妄想分別造種種業果本佛上實無一
物虛通寂靜明妙安樂而已深自悟入直下便是圓
滿具足更無所欠縱使三祇精進修行歷諸地位及
一念證時祇證元來自佛向上更不添得一物却觀
歷劫功用揔是夢中妄爲故如來云我於阿耨菩提
實無所得若有所得然燈佛卽不與我授記又云是
法平等無有高下是名菩提卽此本源清淨心與衆
生諸佛世界山河有相無相徧十方界一切平等無
彼我相此本源清淨心常自圓明徧照世人不悟祇
認見聞覺知爲心爲見聞覺知所覆所以不覩精明

本體但直下無心本體自現如大日輪昇於虛空徧
照十方更無障礙故學道人唯認見聞覺知施爲動
作空却見聞覺知卽心路絕無入處但於見聞覺知
處認本心然本心不屬見聞覺知亦不離見聞覺知
但莫於見聞覺知上起見解亦莫於見聞覺知上動
念亦莫離見聞覺知覓心亦莫捨見聞覺知取法不
卽不離不住不著縱橫自在無非道場世人聞道諸
佛皆傳心法將謂心上別有一法可證可取遂將心
覓法不知心卽是法法卽是心不可將心更求於心
歷千萬劫終無得日不如當下無心便是本法如力

士迷額內珠向外求覓周行十方終不能得智者指
之當時自見本珠如故故學道人迷自本心不認爲
佛遂向外求覓起功用行依次第證歷劫勤求永不
成道不如當下無心決定知一切法本無所有亦無
所得無依無住無能無所不動妄念便證菩提及證
道時祇證本心佛歷劫功用並是虛修如力士得珠
時祇得本額珠不關向外求覓之力故佛言我於阿
耨菩提實無所得恐人不信故引五眼所見五語所
言真實不虛是第一義諦學道人莫疑四大爲身四
大無我我亦無主故知此身無我亦無主五陰爲心

五陰無我亦無主故知此心無我亦無主六根六塵
六識和合生滅亦復如是十八界既空一切皆空唯
有本心蕩然清淨有識食有智食四大之身飢瘡爲
患隨順給養不生貪著謂之智食恣情取味妄生分
別唯求適口不生厭離謂之識食聲聞者因聲得悟
故謂之聲聞但不了自心於聲教上起解或因神通
或因瑞相言語運動聞有菩提涅槃三僧祇劫修成
佛道皆屬聲聞道謂之聲聞佛唯直下頓了自心本
來是佛無一法可得無一行可修此是無上道此是
真如佛學道人祇怕一念有卽與道隔矣念念無相

念念無爲卽是佛學道人若欲得成佛一切佛法摠
不用學唯學無求無著無求卽心不生無著卽心不
滅不生不滅卽是佛八萬四千法門對八萬四千煩
惱祇是教化接引門本無一切法離卽是法知離者
是佛但離一切煩惱是無法可得學道人若欲得知
要訣但莫於心上著一物言佛真法身猶若虛空此
是喻法身卽虛空虛空卽法身常人謂法身徧虛空
處虛空中含容法身不知法身卽虛空虛空卽法身
也若定言有虛空虛空不是法身若定言有法身法
身不是虛空但莫作虛空解虛空卽法身莫作法身

解法身卽虛空虛空與法身無異相佛與衆生無異
相生死與涅槃無異相煩惱與菩提無異相離一切
相卽是佛凡夫取境道人取心心境雙忘乃是真法
忘境猶易忘心至難人不敢忘心恐落空無撈摸處
不知空本無空唯一真法界耳此靈覺性無始已來
與虛空同壽未曾生未曾滅未曾有未曾無未曾穢
未曾淨未曾喧未曾寂未曾少未曾老無方所無內
外無數量無形相無色象無音聲不可覓不可求不
可以智慧識不可以言語取不可以境物會不可以
功用到諸佛菩薩與一切蠢動含靈同此大涅槃性

性卽是心心卽是佛佛卽是法一念離真皆爲妄想
不可以心更求於心不可以佛更求於佛不可以法
更求於法故學道人直下無心默契而已擬心卽差
以心傳心此爲正見慎勿向外逐境認境爲心是認
賊爲子爲有貪嗔癡卽立戒定慧本無煩惱焉有菩
提故祖師云佛說一切法爲除一切心我無一切心
何用一切法本源清淨佛上更不著一物譬如虛空
雖以無量珍寶莊嚴終不能住佛性同虛空雖以無
量功德智慧莊嚴終不能住但迷本性轉不見耳所
謂心地法門萬法皆依此心建立遇境卽有無境卽

無不可於淨性上轉作境解所言定慧鑑用歷歷寂
寂惺惺見聞覺知皆是境上作解暫爲中下根人說
卽得若欲親證皆不可作如此見解盡是境法有沒
處沒於有地但於一切法不作有無見卽見法也

九月一日師謂休曰自達磨大師到中國唯說一心
唯傳一法以佛傳佛不說餘佛以法傳法不說餘法
法卽不可說之法佛卽不可取之佛乃是本源清淨
心也唯此一事實餘二則非真般若爲慧此慧卽無
相本心也凡夫不趣道唯恣六情乃行六道學道人
一念計生死卽落魔道一念起諸見卽落外道見有

生趣其滅卽落聲聞道不見有生唯見有滅卽落緣
覺道法本不生今亦無滅不起二見不厭不忻一切
諸法唯是一心然後乃爲佛乘也凡夫皆逐境生心
心遂忻厭若欲無境當忘其心心忘卽境空境空卽
心滅若不忘心而但除境境不可除祇益紛擾故萬
法唯心心亦不可得復何求哉學般若人不見有一
法可得絕意三乘唯一真實不可證得謂我能證能
得皆增上慢人法華會上拂衣而去者皆斯徒也故
佛言我於菩提實無所得默契而已凡人臨欲終時
但觀五蘊皆空四大無我真心無相不去不來生時

性亦不來死時性亦不去湛然圓寂心境一如但能如是直下頓了不爲三世所拘繫便是出世人也切不得有分毫趣向若見善相諸佛來迎及種種現前亦無心隨去若見惡相種種現前亦無心怖畏但自忘心同於法界便得自在此卽是要節也十月八日師謂休曰言化城者二乘及十地等覺妙覺皆是權立接引之教並爲化城言寶所者乃真心本佛自性之寶此寶不屬情量不可建立無佛無衆生無能無所何處有城若問此旣是化城何處爲寶所寶所不可指指卽有方所非真實所也故云在近而已不可

定量言之但當體會契之卽是言闡提者信不具也
一切六道衆生乃至二乘不信有佛果皆謂之斷善
根闡提菩薩者深信有佛法不見有大乘小乘佛與
衆生同一法性乃謂之善根闡提大抵因聲教而悟
者謂之聲聞觀因緣而悟者謂之緣覺若不向自心
中悟雖至成佛亦謂之聲聞佛學道人多於教法上
悟不於心法上悟雖歷劫修行終不是本佛若不於
心悟乃至於教法上悟卽輕心重教遂成逐塊忘於
本心故但契本心不用求法心卽法也凡人多爲境
礙心事礙理常欲逃境以安心屏事以存理不知乃

是心礙境理礙事但令心空境自空但令理寂事自
寂勿倒用心也凡人多不肯空心恐落於空不知自
心本空愚人除事不除心智者除心不除事菩薩心
如虛空一切俱捨所作福德皆不貪著然捨有三等
內外身心一切俱捨猶如虛空無所取著然後隨方
應物能所皆忘是爲大捨若一邊行道布德一邊旋
捨無希望心是爲中捨若廣修衆善有所希望聞法
知空遂乃不著是爲小捨大捨如火燭在前更無迷
悟中捨如火燭在傍或明或暗小捨如火燭在後不
見坑穽故菩薩心如虛空一切俱捨過去心不可得

是過去捨現在心不可得是現在捨未來心不可得
是未來捨所謂三世俱捨自如來付法迦葉已來以
心印心心心不異印著空卽印不成文印著物卽印
不成法故以心印心心心不異能印所印俱難契會
故得者少然心卽無心得卽無得佛有三身法身說
自性虛通法報身說一切清淨法化身說六度萬行
法法身說法不可以言語音聲形相文字而求無所
說無所證自性虛通而已故曰無法可說是名說法
報身化身皆隨機感現所說法亦隨事應根以爲攝
化皆非真法故曰報化非真佛亦非說法者所言同

是一精明分爲六和合一精明者一心也六和合者六根也此六根各與塵合眼與色合耳與聲合鼻與香合舌與味合身與觸合意與法合中間生六識爲十八界若了十八界無所有束六和合爲一精明一精明者卽心也學道人皆知此但不能免作一精明六和合解遂被法縛不契本心如來現世欲說一乘真法則衆生不信興謗沒於苦海若都不說則墮慳貪不爲衆生溥捨妙道遂說方便說有三乘乘有大小得有淺深皆非本法故云唯有一乘道餘二則非真然終未能顯一心法故召迦葉同法座別付一心

離言說法此一枝法令別行若能契悟者便至佛地矣

問如何是道如何修行師云道是何物汝欲修行問諸方宗師相承叅禪學道如何師云引接鈍根人語未可依憑云此既是引接鈍根人語未審接上根人復說何法師云若是上根人何處更就人覓他自己尚不可得何況更別有法當情不見教中云法法何狀云若如此則都不要求覓也師云若與麼則省心力云如是則渾成斷絕不可是無也師云阿誰教他無他是阿誰你擬覓他云既不許覓何故又言莫斷

他師云若不覓便休卽誰教你斷你見目前虛空作麼生斷他云此法可得便同虛空否師云虛空早晚向你道有同有異我暫如此說你便向者裏生解云應是不與人生解耶師云我不曾障你要且解屬於情情生則智隔云向者裏莫生情是否師云若不生情阿誰道是

問纔向和尚處發言爲什麼便言話墮師云汝自是不解語人有什麼墮負

問向來如許多言說皆是抵敵語都未曾有實法指示於人師云實法無顛倒汝今問處自生顛倒覓什

麼實法云既是問處自生顛倒和尚答處如何師云
你且將物照面看莫管他人又云祇如箇癡狗相似
見物動處便吠風吹草木也不別又云我此禪宗從
上相承已來不曾教人求知求解祇云學道早是接
引之詞然道亦不可學情存學解却成迷道道無方
所名大乘心此心不在內外中間實無方所第一不
得作知解祇是說汝如今情量處情量若盡心無方
所此道天真本無名字祇爲世人不識迷在情中所
以諸佛出來說破此事恐汝諸人不了權立道名不
可守名而生解故云得魚忘筌身心自然達道識心

達本源故號爲沙門沙門果者息慮而成不從學得
汝如今將心求心傍他家舍祇擬學取有什麼得時
古人心利纔聞一言便乃絕學所以喚作絕學無爲
閑道人今時人祇欲得多知多解廣求文義喚作修
行不知多知多解翻成壅塞唯知多與兒酥乳喫消
與不消都揔不知三乘學道人皆是此樣盡名食不
消者所謂知解不消皆爲毒藥盡向生滅中取真如
之中都無此事故云我王庫內無如是刀從前所有
一切解處盡須併却令空更無分別卽是空如來藏
如來藏者更無纖塵可有卽是破有法王出現世間

亦云我於然燈佛所無少法可得此語祇爲空你情
量知解但銷融表裏情盡都無依執是無事人三乘
教網祇是應機之藥隨宜所說臨時施設各各不同
但能了知卽不被惑第一不得於一機一教邊守文
作解何以如此實無有定法如來可說我此宗門不
論此事但知息心卽休更不用思前慮後

問從上來皆云卽心是佛未審卽那箇心是佛師云
你有幾箇心云爲復卽凡心是佛卽聖心是佛師云
你何處有凡聖心耶云卽今三乘中說有凡聖和尚
何得言無師云三乘中分明向你道凡聖心是妄你

今不解返執爲有將空作實豈不是妄妄故迷心汝
但除却凡情聖境心外更無別佛祖師西來直指一
切人全體是佛汝今不識執凡執聖向外馳騁還自
迷心所以向汝道卽心是佛一念情生卽墮異趣無
始已來不異今日無有異法故名成等正覺云和尚
所言卽者是何道理師云覓什麼道理纔有道理便
卽心異云前言無始已來不異今日此理如何師云
祇爲覓故汝自異他汝若不覓何處有異云旣是不
異何更用說卽師云汝若不認凡聖阿誰向汝道卽
卽若不卽心亦不心可中心卽俱忘阿你便擬向何

處覓去

問妄能障自心未審而今以何遣妄師云起妄遣妄亦成妄妄本無根祇因分別而有你但於凡聖兩處情盡自然無妄更擬若爲遣他都不得有纖毫依執名爲我捨兩臂必當得佛云旣無依執當何相承師云以心傳心云若心相傳云何言心亦無師云不得一法名爲傳心若了此心卽是無心無法云若無心無法云何名傳師云汝聞道傳心將謂有可得也所以祖師云認得心性時可說不思議了了無所得得時不說知此事若教汝會何堪也

問祇如目前虛空可不是境豈無指境見心乎師云
什麼心教汝向境上見設汝見得只是箇照境底心
如人以鏡照面縱然得見眉目分明元來祇是影像
何關汝事云若不因照何時得見師云若也涉因常
須假物有什麼了時汝不見他向汝道撥手似君無
一物徒勞謾說數千般云他若識了照亦無物耶師
云若是無物更何用照你莫開眼竊語去
上堂云百種多知不如無求最第一也道人是無事
人實無許多般心亦無道理可說無事散去
問如何是世諦師云說葛藤作什麼本來清淨何假

言說問答但無一切心卽名無漏智汝每日行住坐臥一切言語但莫著有爲法出言瞬目盡同無漏如今末法向去多是學禪道者皆著一切聲色何不與我心心同虛空去如枯木石頭去如寒灰死火去方有少分相應若不如是他日盡被閻老子拷你在你但離却有無諸法心如日輪常在虛空光明自然不照而照不是省力底事到此之時無棲泊處卽是行諸佛行便是應無所住而生其心此是你清淨法身名爲阿耨菩提若不會此意縱你學得多知勤苦修行草衣木食不識自心盡名邪行定作天魔眷屬如

此修行當復何益誌公云佛本是自心作那得向文字中求饒你學得三賢四果十地滿心也祇是在凡聖內坐不見道諸行無常是生滅法勢力盡箭還墜招得來生不如意爭似無爲實相門一超直入如來地爲你不是與舊人須要向古人建化門廣學知解誌公云不逢出世明師枉服大乘法藥你如今一切時中行住坐臥但學無心久久須實得爲你力微小不能頓超但得三年五年或十年須得箇入頭處自然會去爲汝不能如是須要將心學禪學道佛法有什麼交涉故云如來所說皆爲化人如將黃葉爲金

止小兒啼決定不實若有實得非我宗門下客且與
你本體有甚交涉故經云實無少法可得名爲阿耨
菩提若也會得此意方知佛道魔道俱錯本來清淨
皎皎地無方圓無大小無長短等相無漏無爲無迷
無悟了了見無一物亦無人亦無佛大千沙界海中
漚一切聖賢如電拂一切不如心真實法身從古至
今與佛祖一般何處欠少一毫毛旣會如是意大須
努力盡今生去出息不保入息

問六祖不會經書何得傳衣爲祖秀上座是五百人
首座爲教授師講得三十二本經論云何不傳衣師

云爲他有心是有爲法所修所證將爲是也所以五祖付六祖六祖當時祇是默契得密授如來甚深意所以付法與他汝不見道法本法無法無法法亦法今付無法時法法何曾法若會此意方名出家兒方好修行若不信云何明上座走來大庾嶺頭尋六祖六祖便問汝來求何事爲求衣爲求法明上座云不爲衣來但爲法來六祖云汝且暫時斂念善惡都莫思量明乃稟語六祖云不思善不思惡正當與麼時還我明上座父母未生時面目來明於言下忽然默契便禮拜云如人飲水冷暖自知某甲在五祖會中

枉用三十年功夫今日方省前非六祖云如是到此之時方知祖師西來直指人心見性成佛不在言說豈不見阿難問迦葉云世尊傳金襴外別傳何法迦葉召阿難阿難應喏迦葉云倒却門前刹竿著此便是祖師之標榜也甚生阿難三十年爲侍者祇爲多聞智慧被佛呵云汝千日學慧不如一日學道若不學道滴水難銷

問如何得不落階級師云但終日喫飯未曾咬著一粒米終日行未曾踏著一片地與麼時無人我等相終日不離一切事不被諸境惑方名自在人更時時

念念不見一切相莫認前後三際前際無去今際無
住後際無來安然端坐任運不拘方名解脫努力努
力此門中千人萬人祇得三箇五箇若不將爲事受
殃有日在故云著力今生須了却誰能累劫受餘殃

江
海
集
卷
八

江
海
集
卷
八
上
下
人
物
志
一
上
下
人
物
志
一
上
下
人
物
志
一

法海寶筏

宛陵錄 黃檗斷際禪師說

裴相公問師曰山中四五百人幾人得和尚法師云
得者莫測其數何故道在心悟豈在言說言說祇是
化童蒙耳

問如何是佛師云卽心是佛無心是道但無生心動
念有無長短彼我能所等心心本是佛佛本是心心
如虛空所以云佛真法身猶若虛空不用別求有求
皆苦設使恒沙劫行六度萬行得佛菩提亦非究竟
何以故爲屬因緣造作故因緣若盡還歸無常所以

云報化非真佛亦非說法者但識自心無我無人本來是佛

問聖人無心卽是佛凡夫無心莫沉空寂否師云法無凡聖亦無沉寂法本不有莫作無見法本不無莫作有見有之與無盡是情見猶如幻翳所以云見聞如幻翳知覺乃衆生祖宗門中祇論息機忘見所以忘機則佛道隆分別則魔軍熾

問心旣本來是佛還修六度萬行否師云悟在於心非關六度萬行六度萬行盡是化門接物度生邊事設使菩提真如實際解脫法身直至十地四果聖位

盡是度門非關佛心心卽是佛所以一切諸度門中
佛心第一但無生死煩惱等心卽不用菩提等法所
以道佛說一切法度我一切心我無一切心何用一
切法從佛至祖並不論別事唯論一心亦云一乘所
以十方諦求更無餘乘此衆無枝葉唯有諸貞實所
以此意難信達磨來此土至梁魏二國祇有可大師
一人密信自心言下便會卽心是佛身心俱無是名
大道大道本來平等所以深信含生同一真性心性
不異卽性卽心心不異性名之爲祖所以云認得心
性時可說不思議

問佛度衆生否師云實無衆生如來度者我尙不可
得非我何可得佛與衆生皆不可得云現有三十二
相及度衆生何得言無師云凡所有相皆是虛妄若
見諸相非相卽見如來佛與衆生盡是汝作妄見祇
爲不識本心謾作見解纔作佛見便被佛障作衆生
見被衆生障作凡作聖作淨作穢等見盡成其障障
汝心故摠成輪轉猶如獼猴放一捉一無有歇期一
等是學直須無學無凡無聖無淨無垢無大無小無
漏無爲如是一心中方便勤莊嚴聽汝學得三乘十
二分教一切見解摠須捨却所以除去所有唯置一

牀寢疾而臥祇是不起諸見無一法可得不被法障
透脫三界凡聖境域始得名爲出世佛所以云稽首
如空無所依出過外道心旣不異法亦不異心旣無
爲法亦無爲萬法盡由心變所以我心空故諸法空
千品萬類悉皆同盡十方空界同一心體心本不異
法亦不異祇爲汝見解不同所以差別譬如諸天共
寶器食隨其福德飯色有異十方諸佛實無少法可
得名爲阿耨菩提祇是一心實無異相亦無光彩亦
無勝負無勝故無佛相無負故無衆生相云心旣無
相豈得全無三十二相八十種好化度衆生耶師云

三十二相屬相凡所有相皆是虛妄八十種好屬色
若以色見我是人行邪道不能見如來問佛性與衆
生性爲同爲別師云性無同異若約三乘教卽說有
佛性有衆生性遂有三乘因果卽有同異若約佛乘
及祖師相傳卽不說如是事唯指一心非同非異非
因非果所以云唯此一乘道無二亦無三除佛方便
說

問無邊身菩薩爲什麼不見如來頂相師云實無可
見何以故無邊身菩薩便是如來不應更見祇教汝
不作佛見不落佛邊不作衆生見不落衆生邊不作

有見不落有邊不作無見不落無邊不作凡見不落
凡邊不作聖見不落聖邊但無諸見卽是無邊身若
有見處卽名外道外道者樂於諸見菩薩於諸見而
不動如來者卽諸法如義所以云彌勒亦如也衆聖
賢亦如也如卽無生如卽無滅如卽無見如卽無聞
如來頂卽是圓見亦無圓見故不落圓邊所以佛身
無爲不墮諸數權以虛空爲喻圓同太虛無欠無餘
等閑無事莫強辯他境辯著便成識所以云圓成沉
識海流轉若飄蓬祇道我知也學得也契悟也解脫
也有道理也強處卽如意弱處卽不如意似者箇見

江
解有什麼用處我向汝道等閑無事莫謾用心不用
求真唯須息見所以內見外見俱錯佛道魔道俱惡
所以文殊暫起二見貶向二鐵圍山文殊卽實矩普
賢卽權智權實相對治究竟亦無權實唯是一心心
且不佛不衆生無有異見纔有佛見便作衆生見有
見無見常見斷見便成二鐵圍山被見障故祖師直
指一切衆生本心本體本來是佛不假修成不屬漸
次不是明暗不是明故無明不是暗故無暗所以無
無明亦無無明盡入我此宗門切須在意如此見得
名之爲法見法故名之爲佛佛法俱無名之爲僧喚

作無爲僧亦名一體三寶夫求法者不著佛求不著法求不著衆求應無所求不著佛求故無佛不著法求故無法不著衆求故無僧

問和尚見今說法何得言無僧亦無法師云汝若見有法可說卽是以音聲求我若見有我卽是處所法亦無法法卽是心所以祖師云付此心法時法法何曾法無法無本心始解心心法實無一法可得名坐道場道場者祇是不起諸見悟法本空喚作空如來藏本來無一物何處有塵埃若得此中意逍遙何所論

問本來無一物無物便是否師云無亦不是菩提無是處亦無無知解

問何者是佛師云汝心是佛佛卽是心心佛不異故云卽心卽佛若離於心別更無佛云若無心是佛祖師西來如何傳授師云祖師西來唯傳心佛直指汝等心本來是佛心心不異故名爲祖若直下見此意卽頓超三乘一切諸位本來是佛不假修成云若如此十方諸佛出世說於何法師云十方諸佛出世祇共說一心法所以佛密付與摩訶大迦葉此一心法體盡虛空徧法界名爲諸佛理論者箇法豈是汝於

言句上解得他亦不是於一機一境上見得他此意
唯是默契得者一門名爲無爲法門若欲會得但知
無心忽悟卽得若用心擬學取卽轉遠去若復歧路
心一切取捨心心如木石始有學道分云如今現有
種種妄念何以言無師云妄本無體卽是汝心所起
汝若識心是佛心本無妄那得起心更認於妄汝若
不生心動念自然無妄所以云心生則種種法生心
滅則種種法滅云今正妄念起時佛在何處師云汝
今覺妄起時覺正是佛可中若無妄念佛亦無何故
如此爲汝起心作佛見便謂有佛可成作衆生見便

謂有衆生可度起心動念摠是汝見處若無一切見
佛有何處所如文殊纔起佛見便貶向二鐵圍山云
今正悟時佛在何處師云問從何來覺從何起語默
動靜一切聲色盡是佛事何處覓佛不可更頭上安
頭觜上加觜但莫生異見山是山水是水僧是僧俗
是俗山河大地日月星辰摠不出汝心三千世界都
來是汝箇自己何處有許多般心外無法滿目青山
虛空世界皎皎地無絲髮許與汝作見解所以一切
聲色是佛之慧目法不孤起仗境方生爲物之故有
其多智終日說何曾說終日聞何曾聞所以釋迦四

十九年說未曾說著一字云若如此何處是菩提師云菩提無是處佛亦不得菩提衆生亦不失菩提不可以身得不可以心求一切衆生卽菩提相云如何發菩提心師云菩提無所得你今但發無所得心決定不得一法卽菩提心菩提無住處是故無有得者故云我於然燈佛所無有小法可得佛卽與我授記明知一切衆生本是菩提不應更得菩提你今聞發菩提心謂將一箇心學取佛去唯擬作佛任你三祇劫修亦祇得箇報化佛與你本源真性佛有何交涉故云外求有相佛與汝不相似

問本既是佛那得更有四生六道種種形貌不同師
云諸佛體圓更無增減流入六道處處皆圓萬類之
中箇箇是佛譬如一團水銀分散諸處顆顆皆圓若
不分時祇是一塊皆一卽一切一切卽一種種形貌
喻如屋舍捨驢屋入人屋捨人身至天身乃至聲聞
緣覺菩薩佛屋皆是汝取捨處所以有別本源之性
何得有別

問諸佛如何行大慈悲爲衆生說法師云佛慈悲者
無緣故名大慈悲慈者不見有佛可成悲者不見有
衆生可度其所說法無說無示其聽法者無聞無得

譬如幻士爲幻人說法者箇法若爲道我從善知識
言下領得會也悟也者箇慈悲若爲汝起心動念學
得他見解不是自悟本心究竟無益

問何者是精進師云身心不起是名第一牢強精進
纔起心向外求者名爲歌利王愛遊獵去心不外遊
卽是忍辱仙人身心俱無卽是佛道

問若無心行此道得否師云無心卽便是行此道更
說什麼得與不得且如瞥起一念便是境若無一念
便是境妄心自滅無復可追尋

問如何是出三界師云善惡都莫思量當處便出三

法華經疏
界如來出世爲破三有若無一切心三界亦非有如
一微塵破爲百分九十九分是無一分是有摩訶衍
不能勝出百分俱無摩訶衍始能勝出

上堂云卽心是佛上至諸佛下至蠢動含靈皆有佛
性同一心體所以達磨從西天來唯傳一心法直指
二切衆生本來是佛不假修行但如今識取自心見
自本性更莫別求云何識自心卽如今言語者正是
汝心若不言語又不作用心體如虛空相似無有相
貌亦無方所亦不一向是無有而不可見故祖師云
真性心地藏無頭亦無尾應緣而化物方便呼爲智

若不應緣之時不可言其有無正應之時亦無蹤跡
既知如此如今但向無中棲泊卽是行諸佛路經云
應無所住而生其心一切衆生輪迴生死者意緣走
作心於六道不停致使受種種苦淨名云難化之人
心如猿猴故以若干種法制禦其心然後調伏所以
心生種種法生心滅種種法滅故知一切諸法皆由
心造乃至人天地獄六道修羅盡由心造如今但學
無心頓息諸緣莫生妄想分別無人無我無貪嗔無
憎愛無勝負但除却如許多種妄想性自本來清淨
卽是修行菩提法佛等若不會此意縱你廣學勤苦

修行木食草衣不識自心皆名邪行盡作天魔外道
水陸諸神如此修行當復何益誌公云本體是自心
作那得文字中求如今但識自心息却思惟妄想塵
勞自然不生淨名云唯置一牀寢疾而臥心不起也
如今臥疾攀緣都息妄想歇滅卽是菩提如今若心
裏紛紛不定任你學到三乘四果十地諸位合殺祇
向凡聖中坐諸行盡歸無常勢力皆有盡期猶如箭
射於空力盡還墜却歸生死輪迴如斯修行不解佛
意虛受辛苦豈非大錯誌公云未逢出世明師枉服
大乘法藥如今但一切時中行住坐臥但學無心亦

無分別亦無依倚亦無住著終日任運騰騰如癡人
相似世人盡不識你你亦不用教人識不識心如頑
石頭都無縫罅一切法透汝心不入兀然無著如此
始有少分相應透得三界境過名爲佛出世不漏心
相名爲無漏智不作人天業不作地獄業不起一切
心諸緣盡不生卽此身心是自由人不是一向不生
祇是隨意而生經云菩薩自意生身是也忽若未會
無心著相而作者皆屬魔業乃至作淨土佛事並皆
成業乃名佛障障汝心故被因果管束去住無自由
分所以菩提等法本不是有如來所說皆是化人猶

如黃葉爲金錢權止小兒啼故實無有法名阿耨菩
提如今既會此意何用區區但隨緣消舊業更莫造
新殃心裏明明所以舊時見解摠須捨却淨名云除
去所有法華云二十年中常令除糞祇是除去心中
作見解處又云蠲除戲論之糞所以如來藏本自空
寂並不停留一法故經云諸佛國土亦復皆空若言
佛道是修學而得如此見解全無交涉或作一機一
境揚眉動目祇對相當便道契會也得證悟禪理也
忽逢一人不解便道都無所知對他若得道理心中
便歡喜若被他折伏不如他便卽心懷惆悵如此心

意學禪有何交涉任汝會得少許道理祇得箇心所
法禪道揔沒交涉所以達磨面壁都不令人有見處
故云忘機是佛道分別是魔境此性縱汝迷時亦不
失悟時亦不得天真自性本無迷悟盡十方虛空界
元來是我一心體縱汝動用造作豈離虛空虛空本
來無大無小無漏無爲無迷無悟了了見無一物亦
無人亦無佛絕纖毫的量是無依倚無粘綴一道清
流是自性無生法忍何有擬議真佛無口不解說法
真聽無耳其誰聞乎珍重

江
滿
金
卷
一

卷一
一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

法海寶筏

真心直說 普照禪師說

真心正信

華嚴云信爲道源功德母長養一切諸善根又唯識云信如水晶珠能清濁水故是知萬善發生信爲前導故佛經首立如是我聞生信之所謂也或曰祖門之信與教門信有何異耶曰多種不同教門令人天信於因果有愛福樂者信十善爲妙因人天爲樂果有樂空寂者信生滅因緣爲正因苦集滅道爲聖果有樂佛果者信三劫六度爲大因菩提涅槃爲正果

祖門正信非同前也不信一切有爲因果只要信自
已本來是佛天真自性人人具足涅槃妙體箇箇圓
成不假他求從來自備三祖云圓同太虛無欠無餘
良由取舍所以不如誌公云有相身中無相身無明
路上無生路永嘉云無明實性卽佛性幻化空身卽
法身故知衆生本來是佛旣生正信須要解滋永明
云信而不解增長無明解而不信增長邪見故知信
解相兼得入道疾或曰初發信心未能入道有利益
不曰起信論云若人聞是法已不生怯弱當知是人
定紹佛種必爲諸佛之所授記假使有人能化三千

大千世界滿中衆生令行十善不如有人於一念頃
正思惟此法過前功德不可爲喻又般若經云乃至
一念生淨信者如來悉知悉見是諸衆生得如是無
量福德是知欲行千里初步要正初步若錯千里俱
錯入無爲國初信要正初信旣失萬善俱退故祖師
云毫釐有差天地懸隔是此理也

真心異名

或曰已生正信未知何名真心曰離妄名真靈鑑曰
心楞嚴經中發明此心或曰但名真心別有異號耶
曰佛教祖教立名不同且佛教者菩薩戒呼爲心地

發生萬善故般若經喚作菩提與覺爲體故華嚴經
立爲法界交徹融攝故金剛經號爲如來無所從來
故般若經呼爲涅槃衆聖所歸故金光明號曰如如
真常不變故淨名經號曰法身報化依止故起信論
名曰真如不生不滅故涅槃經呼爲佛性三身本體
故圓覺中名曰總持流出功德故勝鬘經號曰如來
藏隱覆含攝故了義經名爲圓覺破暗獨照故由是
壽禪師唯心訣云一法千名應緣立號備在衆經不
能具引或曰佛教已知祖教何如曰祖師門下杜絕
名言一名不立何更多名應感隨機其名亦衆有時

呼爲自己衆生本性故有時名爲正眼鑑諸有相故
有時號曰妙心虛靈寂照故有時名曰主人翁從來
荷負故有時呼爲無底鉢隨處生涯故有時喚作沒
絃琴韻出今時故有時號曰無盡燈照破迷情故有
時名曰無根樹根蒂堅牢故有時呼爲吹毛劒截斷
塵根故有時喚作無爲國海晏河清故有時號曰牟
尼珠濟益貧窮故有時名曰無鑄鎖關閉六情故乃
至名泥牛木馬心源心印心鏡心月心珠種種異名
不可具錄若達真心諸名盡曉昧此真心諸名皆滯
故於真心切宜子細

真心妙體

或曰真心已知名字其體如何耶曰放光般若經云
般若無所有相無生滅相起信論云真如自體者一
切凡夫聲聞緣覺菩薩諸佛無有增減非前際生非
後際滅畢竟常恒從本已來性自滿足一切功德據
此經論真心本體超出因果通貫古今不立凡聖無
諸對待如太虛空徧一切處妙體凝寂絕諸戲論不
生不滅非有非無不動不搖湛然常住喚作舊日主
人翁名曰威音那畔人又名空劫前自己一種平懷
無纖毫瑕翳一切山河大地草木叢林萬象森羅染

淨諸法皆從中出故圓覺經云善男子無上法王有
大陀羅尼門名爲圓覺流出一切清淨真如菩提涅槃
及波羅蜜教授菩薩圭峰云心也者冲虛妙粹炳
煥靈明無去無來冥通三際非中非外洞徹十方不
滅不生豈四山之可害離性離相奚五色之能盲故
永明唯心訣云夫此心者衆妙羣靈而普會爲萬法
之王三乘五性而冥歸作千聖之母獨尊獨貴無比
無儔實大道源是真法要信之則三世菩薩同學蓋
學此心也三世諸佛同證蓋證此心也一大藏教詮
顯蓋顯此心也一切衆生迷妄蓋迷此心也一切行

人發悟蓋悟此心也一切諸祖相傳蓋傳此心也天下衲僧叅訪蓋叅此心也達此心則頭頭皆是物物全彰迷此心則處處顛倒念念痴狂此體是一切衆生本有之佛性乃一切世界生發之根源故世尊鷲峰良久善現巖下忘言達磨少室壁觀居士毗耶杜口悉皆發明此心妙體故初入祖門庭者要先識此心體也

真心妙用

或曰妙體已知何名妙用耶曰古人云風動心搖樹雲生性起塵若明今日事昧却本來人乃妙體起用

也真心妙體本來不動安靜真常真常體上妙用現
前不妨隨流得妙故祖師頌云心隨萬境轉轉處實
能幽隨流認得性無喜亦無憂故一切時中動用施
爲東行西往喫飯着衣拈匙弄筋左顧右盼皆是真
心妙用現前凡夫迷倒於着衣時只作着衣會喫飯
時只作喫飯會一切事業但隨相轉所以在日用而
不覺在目前而不知若是識性底人動用施爲不會
昧却故祖師云在胎名神處世名人在眼觀照在耳
聽聞在鼻嗅香在口談論在手執捉在足運奔徧現
俱該法界收攝在一微塵知之者爲是佛性不識者

江洲實錄
喚作精魂所以道吾舞笏石鞏拈弓祕魔擎杈俱胝
豎指忻州打地雲巖師子莫不發明這着大用於日
用不迷自然縱橫無礙

真心體用一異

或曰真心體用未審是一是異耶曰約相則非一約
性則非異故此體用非一非異何以知然試爲論之
妙體不動絕諸對待離一切相非達性契證者莫測
其理也妙用隨緣應諸萬類妄立虛相似有形狀約
此有相無相故非一也又用從體發用不離體體能
發用體不離用約此不相離理故非異也如水以濕

爲體體無動故波以動爲相因風起故水性波相動與不動故非一也然波外無水水外無波濕性是一故非異也類上體用一異可知矣

真心在迷

或曰真心體用人人具有何爲聖凡不同耶曰真心聖凡本同凡夫妄心認物失自淨性爲此所隔所以真心不得現前但如暗中樹影地下流泉有而不識耳故經云善男子譬如清淨摩尼寶珠映於五色隨方各現諸愚痴者見彼摩尼實有五色善男子圓覺淨性現於身心隨類各應彼愚痴者說淨圓覺實見

如是身心自性亦復如是肇論云乾坤之內宇宙之間中有一寶祕在形山此乃真心在纏也又慈恩云法身本有諸佛共同凡夫由妄覆有而不覺煩惱纏裏得如來藏名裴公云終日圓覺而未嘗圓覺者凡夫也故知真心雖在塵勞不爲塵勞所染如白玉投泥其色不改也

真心息妄

或曰真心在妄則是凡夫如何得出妄成聖耶曰古云妄心無處卽菩提生死涅槃本平等經云彼之衆生幻身滅故幻心亦滅幻心滅故幻塵亦滅幻塵滅

故幻滅亦滅幻滅滅故非幻不滅譬如磨鏡垢盡明
現永嘉亦云心是根法是塵兩種猶如鏡上痕痕垢
盡時光始現心法雙忘性卽真此乃出妄而成真也
或曰莊生云心者其熱焦火其寒凝冰其疾俛仰之
間再撫四海之外其居也淵而靜其動也懸而天者
其惟人心乎此莊生先說凡夫心不可治伏如此也
未審宗門以何法治妄心也曰以無心法治妄心也
或曰人若無心便同草木無心之說請施方便曰今
云無心非無心體名無心也但心中無物名曰無心
如言空瓶瓶中無物名曰空瓶非瓶體無名空瓶也

故祖師云汝但於心無事於事無心自然虛而靈寂而妙是此心旨也據此則以無妄心非無真心妙用也從來諸師說做無心功夫類各不同今總大義畧明十種一曰覺察謂做功夫時平常絕念隄防念起一念纔生便與覺破妄念破覺後念不生此之覺智亦不須用妄覺俱忘名曰無心故祖師云不怕念起只恐覺遲又偈云不用求真唯須息見此是息妄功夫也二曰休歇謂做功夫時不思善不思惡心起便休遇緣便歇古人云一條白練去冷湫湫地去古廟裏香爐去直得絕廉纖離分別如痴似兀方有少分

相應此休歇安心功夫也三泯心存境謂做功夫時
於一切妄念俱息不顧外境但自息心安心已息何
害有境卽古人奪人不奪境法門也故有語云是處
有芳草滿城無故人又龐公云但自無心於萬物何
妨萬物常圍繞此是泯心存境息妄功夫也四泯境
存心謂做功夫時將一切內外諸境悉觀爲空寂只
存一心孤標獨立所以古人云不與萬法爲侶不與
諸塵作對心若着境心卽是妄今旣無境何妄之有
乃真心獨照不礙於道卽古人奪境不奪人也故有
語云上園花已謝車馬尙駢闐又云三千劍客今何

在獨計莊周定太平此是泯境存心息妄功夫也五
泯心泯境謂做功夫時先空寂外境次滅內心既內
外心境俱寂畢竟妄從何有故灌溪云十方無壁落
四面亦無門淨裸裸赤灑灑卽祖師人境兩俱奪法
門也故有語云雲散水流去寂然天地空又云人牛
俱不見正是月明時此泯心泯境息妄功夫也六存
心存境謂做功夫時心住心位境住境位有時心境
相對則心不取境境不臨心各不相到自然妄念不
生於道無礙故經云是法住法位世間相常住卽祖
師人境俱不奪法門也故有語云一片月生海幾家

人上樓又云山花千萬朵遊子不知歸此是存境存
心滅妄功夫也七內外全體謂做功夫時於山河大
地日月星辰內身外器一切諸法同真心體湛然虛
明無一毫異大千沙界打成一片更於何處得妄心
來所以肇法師云天地與我同根萬物與我同體此
是內外全體滅妄功夫也八內外全用謂做功夫時
將一切內外身心器界諸法及一切動用施爲悉觀
作真心妙用一切心念纔生便是妙用現前旣一切
皆是妙用妄心向甚麼處安着故永嘉云無明實性
卽佛性幻化空身卽法身誌公十二時歌云平朝寅

狂機內隱道人身坐臥不知元是道只麼忙忙受苦
辛此是內外全用息妄功夫也九卽體卽用謂做功
夫時雖冥合真體一味空寂而於中內隱靈明乃體
卽用也故永嘉云惺惺寂寂是惺惺妄想非寂寂惺
惺是寂寂無記非旣寂寂中不容無記惺惺中不用
亂想所有妄心如何得生此是卽體卽用滅妄功夫
也十透出體用謂做功夫時不分內外亦不辨東西
南北將四方八面只作一箇大解脫門圓陀陀地體
用不分無分毫滲漏通身打成一片其妄何處得起
古人云通身無縫罅上下忒團圓是乃透出體用滅

妄功夫也已上十種做功夫法不須全用但得一門功夫成就其妄自滅真心卽現隨根宿習曾於何法有緣卽便習之此之功夫乃無功之功非有心功力也此箇休歇妄心法門最緊要故偏多說無文繁也

真心四儀

或曰前說息妄未審但只坐習亦通行住等耶曰經論多說坐習所以易成故亦通行住等久漸成純熟故起信論云若修止者住於靜處端坐正意不依氣息不依形色不依於空不依地水火風乃至不依見聞覺知一切諸想隨念皆除亦遣除想以一切法本

來無想念念不生念念不滅亦不得隨心外念境界
後以心除心心若馳散卽當收來住於正念是正念
者當知唯心無外境界卽復此心亦無自相念念不
可得若從坐起去來進止有所施作於一切時常念
方便隨順觀察久習純熟其心得住以心住故漸漸
猛利隨順得入真如三昧深伏煩惱信心增長速成
不退唯除疑惑不信誹謗重罪業障我慢懈怠如是
等人所不能入據此則通四儀也圓覺經云先依如
來奢摩他行堅持禁戒安處徒衆宴坐靜室此初習
也永嘉云行亦禪坐亦禪語默動靜體安然據此亦

通四儀耳總論功力坐尙不能息心况行住等豈能入道耶若是用得純熟底人千聖興來驚不起萬般魔妖不迴顧豈况行住坐中不能做功夫也如人欲讎恨於人乃至行住坐臥飲食動用一切時中不能忘了欲愛樂於人亦復如是且憎愛有心中事尙於有心中容得今做功夫是無心事又何疑四儀中不常現前耶只恐不信不爲若爲若信則威儀中道必不失也

真心所在

或曰息妄心而真心現矣然則真心體用今在何處

曰真心妙體徧一切處永嘉云不離當處常湛然覓
卽知君不可見經云虛空性故常不動故如來藏中
無起滅故大法眼云處處菩提路頭頭功德林此卽
是體所在也真心妙用隨感隨現如谷應聲法燈云
今古應無墜分明在目前片雲生晚谷孤鶴下遙天
所以魏府元華嚴云佛法在日用處在行住坐臥處
喫茶喫飯處語言相問處所作所爲舉心動念又却
不是也故知體則徧一切處悉能起用但因緣有無
不定故妙用不定耳非無妙用也修心之人欲入無
爲海度諸生死莫迷真心體用所在也

真心出死

或曰嘗聞見性之人出離生死然往昔諸祖是見性人皆有生有死今現見世間修道之人有生有死事如何云出生死耶曰生死本無妄計爲有如人病眼見空中花無病人說無空花病者不信目病若無空花自滅方信花無只花未滅其花亦空但病者妄執爲花非體實有也如人妄認生死爲有或無生死人告云本無生死彼人不信一朝妄息生死自除方知生死本來是無只生死未息時亦非實有以妄認生死有故經云善男子一切衆生從無始來種種顛倒

如迷人四方易處妄認四大爲自身相六塵緣影爲
自心相譬彼病目見空中花乃至如衆空花滅於虛
空不可說言有定滅處何以故無生處故一切衆生
於無生中妄見生滅是故說名輪轉生死據此經文
信知達悟圓覺真心本無生死今知無生死而不能
脫生死者功夫不到故也故教中說菴婆女問文殊
云明知生是不生之法爲甚麼被生死之所流文殊
云其力未充故後有進山主問修山主云明知生是
不生之法爲甚麼却被生死之所流修云笋畢竟成
竹去如今作筏使得麼所以知無生死不如體無生

死體無生死不如契無生死契無生死不如用無生死今人尙不知無生死况體無生死契無生死用無生死耶故認生死者不信無生死法不亦宜乎

真心正助

或曰如前息妄真心現前且如妄未息時但只歇妄做無心功夫更有別法可對治諸妄耶曰正助不同也以無心息妄爲正以習衆善爲助譬如明鏡爲塵所覆雖以手力揩拭要須妙藥磨瑩光始現也塵垢煩惱也手力無心功也磨藥衆善也鏡光真心也起信論云復次信成就發心者發何等心畧有三種云

何爲三一者直心正念真如法故二者深心集一切善行故三者大悲心欲拔一切衆生苦故問曰上說法界一相佛體無二何故不唯念真如復假求學諸善之行答曰譬如大摩尼寶體性明淨而有鑛穢之垢若人雖念寶性不以方便種種磨治終無得淨如是衆生真如之法體性空淨而有無量煩惱染垢若人雖念真如不以方便種種熏習亦無得淨以垢無量徧一切法故修一切善行以爲對治若人修行一切善法自然歸順真如法故據此所論以休歇妄心爲正修諸善法爲助若修善時與無心相應不取着

因果若取因果便落凡夫人天報中難證真如不脫
生死若與無心相應乃是證真如之方便脫生死之
要術兼得廣大福德金剛般若經云須菩提菩薩無
住相布施其福德不可思量今見世人有叅學者纔
知有箇本來佛性乃便自恃天真不習衆善豈只於
真心不達亦乃翻成懈怠惡道尙不能免况脫生死
此見大錯也

真心功德

或曰有心修因不疑功德矣無心修因功德何來曰
有心修因得有爲果無心爲因顯性功德此諸功德

本來自具妄覆不顯今旣妄除功德現前故永嘉云
三身四智體中圓八解六通心地印乃是體中自具
性功德也古頌若人靜坐一須臾勝造恒沙七寶塔
寶塔畢竟化爲塵一念淨心成正覺故知無心功大
於有心也洪州水潦和尚叅馬祖問如何是西來的
的意被馬祖一踏踏到忽然發悟起來撫掌大笑云
也大奇也大奇百千三昧無量妙義只向一毛頭上
便一時識得根源去乃作禮而退據此則功德不從
外來本自具足也四祖謂懶融禪師曰夫百千法門
同歸方寸河沙功德總在心源一切戒門定門慧門

神通變化悉自具足不離汝心據祖師語無心功德甚多但好事相功德者於無心功德自不生信耳

真心驗功

或曰真心現前如何知是真心成熟無礙也曰學道之人得真心現前時但習氣未除若遇熟境有時失念如牧牛雖調到牽拽隨順處猶不敢放了鞭繩直待心調步穩趕趁入苗稼中不傷苗稼方敢撒手也到此地步便不用牧童鞭繩自然無傷苗稼如道人得真心後先且用功保養有大力用方可利生若驗此真心時先將平生所愛底境時時想在面前如依

前起憎愛心則道心未熟若不生憎愛心是道心熟也雖然如此成熟猶未是自然不起憎愛又再驗心若遇憎愛境時特然起憎愛心令取憎愛境界若心不起是心無礙如露地白牛不傷苗稼也古有呵佛罵祖者是與此心相應今見纔入宗門未知道之遠近便學呵佛罵祖者太早計也

真心無知

或曰真心與妄心對境時如何辨別真妄耶曰妄心對境有知而知於順違境起貪嗔心又於中容境起癡心也既於境上起貪嗔癡三毒足見是妄心也祖

師云逆順相爭是爲心病故知對於不可者是妄心也若真心者無知而知平懷圓照故異於草木不生憎愛故異於妄心卽對境虛明不憎不愛無知而知者真心故肇論云夫聖心者微妙無相不可爲有用之彌勤不可爲無乃至非有故知而無知非無故無知而知是以無知卽知無以言異於聖人心也又妄心在有著有在無著無常在二邊不知中道永嘉云捨妄心取真理取捨之心成巧僞學人不了用修行深成認賊將爲子若是真心居有無而不落有無常處中道故祖師云不逐有緣勿住空忍一種平懷

泯然自盡肇論云是以聖人處有不有居無不無雖
不取於有無然不捨於有無所以和光塵勞周旋五
趣寂然而往忽爾而來恬淡無爲而無不爲此說聖
人垂手爲人周旋五趣接化衆生雖往來而無往來
相妄心不爾故真心妄心不同也又真心乃平常心
也妄心乃不平常心也或曰何名平常心也曰人人
具有一點靈明湛若虛空徧一切處對俗事假名理
性對行識權號真心無分毫分別遇緣不昧無一念
取捨觸物皆周不逐萬境遷移設使隨流得妙不離
當處湛然覓卽知君不見乃真心也或曰何名不平

常心耶曰境有聖與凡境有染與淨境有斷與常境
有理與事境有生與滅境有動與靜境有去與來境
有好與醜境有善與惡境有因與果境有細論則萬
別千差今乃且舉十對皆名不平常境也心隨此不
平常境而生不平常境而滅不平常境心對前平常
真心所以名不平常安心也真心本具不隨不平常
境生起種種差別所以名平常真心也或曰真心平
常無諸異因奈何佛說因果善惡報應乎曰安心逐
種種境不了種種境遂起種種心佛說種種因果法
治伏種種安心須立因果也若此真心不逐種種境

由是不起種種心佛卽不說種種法何有因果也或曰真心平常不生耶曰真心有時施用非逐境生但妙用遊戲不昧因果耳

真心所往

或曰未達真心人由迷真心故作善惡因由作善因故生善道中由作惡因故入惡道中逐業受生其理不疑若達真心人妄情歇盡契證真心無善惡因一靈身後何所依託耶曰莫謂有依託者勝無依託耶又莫將無依託者同人間飄零之蕩子似鬼趣無主之孤魂特爲此問求有依託耶或曰然曰達性則不

然也一切衆生迷覺性故妄情愛念結業爲因生六
趣中受善惡報假如天業爲因只得天果除合生處
餘竝不得受用諸趣皆爾旣從其業故合生處爲樂
不生處爲非樂以合生處爲自已依託不生處爲他
人依託所以有妄情則有妄因有妄因則有妄果有
妄果則有依託有依託則分彼此分彼此則有可不
可也今達真心契無生滅之覺性起無生滅之妙用
妙體真常本無生滅妙用隨緣似有生滅然從體生
用用卽是體何生滅之可有達人卽證真體其生滅
何干涉耶如水以濕性爲體波浪爲用濕性元無生

滅故波中濕性何生滅耶然波離濕性別無故波亦
無生滅所以古人云盡大地是沙門一隻正眼盡大
地是箇伽藍是悟理人安身立命處既達真心四生
六道一時消殞山河大地悉是真心不可離此真心
之外別有依託處也既無三界妄因必無六趣妄果
妄果既無說甚依託別無彼此既無彼此則何可不
可也卽十方世界唯一真心全身受用無別依託又
於示現門中隨意往生而無障礙故傳燈云溫操尙
書問圭峰曰悟理之人一期壽終何所依託圭峰曰
一切衆生無不具有靈明覺性與佛無殊若能悟此

性卽是法身本自無生何有依託靈明不昧了了常
知無所從來亦無所去但以空寂爲自體勿認色身
以靈知爲自心勿認妄念妄念若起都不隨之則臨
命終時自然業不能繫雖有中陰所向自由天上人
間隨意寄託此卽真心身後所往者也

[illegible]

法海寶筏

修心訣

普照禪師說

三界熱惱猶如火宅其忍淹留甘受長苦欲免輪迴
莫若求佛若欲求佛佛卽是心心何遠覓不離身中
色身是假有生有滅真心如空不斷不變故云百骸
潰散歸火歸風一物長靈蓋天蓋地嗟夫今之人迷
來久矣不識自心是真佛不識自性是真法欲求法
而遠推諸聖欲求佛而不觀已心若言心外有佛性
外有法堅執此情欲求佛道者縱經塵劫燒身鍊臂
敲骨出髓刺血寫經長坐不臥一食卯齋乃至轉讀

一大藏教修種種苦行如蒸沙作飯只益自勞爾但識自心恒沙法門無量妙義不求而得故世尊云普觀一切衆生具有如來智慧德相又云一切衆生種種幻化皆生如來圓覺妙心是知離此心外無佛可成過去諸如來只是明心底人現在諸賢聖亦是修心底人未來修學人當依如是法願諸修道之人切莫外求心性無染本自圓成但離妄緣卽如如佛問若言佛性現在此身旣在身中不離凡夫因何我今不見佛性更爲消釋悉令開悟答在汝身中汝自不見汝於十二時中知飢知渴知寒知熱或瞋或喜竟

是何物且色身是地水火風四緣所集其質頑而無情豈能見聞覺知能見聞覺知者必是汝佛性故臨濟云四大不說法聽法虛空不說法聽法只汝目前歷歷孤明勿形段者始說法聽法所謂勿形段者是諸佛之法印亦是汝本來心也則佛性現在汝身何假外求汝若不信畧舉古聖入道因緣令汝除疑汝須諦信昔異見王問婆羅提尊者曰何者是佛尊者曰見性是佛王曰師見性否尊者曰我見佛性王曰性在何處尊者曰性在作用王曰是何作用我今不見尊者曰今現作用王自不見王曰於我有

否尊者曰王若作用無有不是王若不用體亦難見
王曰若當用時幾處出現尊者曰若出現時當有其
八王曰其八出現當爲我說尊者曰在胎曰身處世
曰人在眼曰見在耳曰聞在鼻辨香在舌談論在手
執捉在足運奔徧現俱該沙界收攝在一微塵識者
知是佛性不識者喚作精魂王聞心卽開悟又僧問
歸宗和尚如何是佛宗云我今向汝道恐汝不信僧
云和尚誠言焉敢不信師云卽汝是僧云如何保任
師云一翳在眼空華亂墜其僧言下有省上來所舉
古聖入道因緣明白簡易不妨省力因此公案若有

信解處卽與古聖把手共行問汝言見性若真見性卽是聖人應現神通變化與人有殊何故今時修心之輩無有一人發現神通變化耶答汝不得輕發狂言不分邪正是爲迷倒之人今時學道之人口談真理心生退屈返墮無分之失者皆汝所疑學道而不知先後說理而不分本末者是名邪見不名修學非唯自誤兼亦誤他其可不慎歟夫入道多門以要言之不出頓悟漸修兩門耳雖曰頓悟頓悟是最上根機得入也若推過去已是多生依悟而修漸熏而來至於今生聞卽發悟一時頓畢以實而論是亦先悟

後修之機也則而此頓漸兩門是千聖軌轍也則從上諸聖莫不先悟後修因修乃證所言神通變化依悟而修漸熏所現非謂悟時卽發現也如經云理卽頓悟乘悟併消事非頓除因次第盡故圭峰深明先悟後修之義曰識水池而全水借陽氣以鎔消悟凡夫而卽佛資法力以熏修水消則水流潤方呈漑滌之功妄盡則心靈通應現通光之用是知事上神通變化非一日之能成乃漸熏而發現也况事上神通於達人分上猶爲妖怪之事亦是聖末邊事雖或現之不可要用今時迷癡輩妄謂一念悟時卽隨現無

量妙用神通變化若作是解所謂不知先後亦不分
本末也既不知先後本末欲求佛道如將方木逗圓
孔也豈非大錯既不知方便故作懸崖之想自生退
屈斷佛種性者不爲不多矣既自未明亦未信他人
有解悟處見無神通者乃生輕慢欺賢誑聖良可悲
哉問汝言頓悟漸修兩門千聖軌轍也悟既頓悟何
假漸修修若漸修何言頓悟頓漸二義更爲宣說令
絕餘疑答頓悟者凡夫迷時四大爲身妄想爲心不
知自性是真法身不知自己靈知是真佛也心外覓
佛波波浪走忽被善知識指爾入路一念迴光見自

本性而此性地元無煩惱無漏智性本自具足卽與諸佛分毫不殊故云頓悟也漸修者雖悟本性與佛無殊無始習氣難卒頓除故依悟而修漸熏功成長養聖胎久久成聖故云漸修也比如孩子初生之日諸根具足與他無異然其力未充頗經歲月方始成人問作何方便一念迴機便悟自性答只汝自心更作什麼方便若作方便更求解會比如有人不見自眼以謂無眼更欲求見既是自眼如何更見若知不失卽爲見眼更無求見之心豈有不見之想自己靈知亦復如是既是自心何更求會若欲求會便會不

得但知不會是卽見性問上上之人聞卽易會中下
之人不無疑惑更說方便令迷者趣入答道不屬知
不知汝除卻將迷待悟之心聽我言說諸法如夢亦
如幻化故妄念本寂塵境本空諸法皆空之處靈知
不昧卽此空寂靈知之心是汝本來面目亦是三世
諸佛歷代祖師天下善知識密密相傳底法印也若
悟此心真所謂不踐階梯徑登佛地步步超三界歸
家頓絕疑便與人天爲師悲智相資具足二利堪受
人天供養日消萬兩黃金汝若如是真大丈夫一生
能事已畢矣問據吾分上何者是空寂靈知之心耶

答汝今問我者是汝空寂靈知之心何不返照猶爲
外覓我今據汝分上直指本心令汝便悟汝須淨心
聽我言說從朝至暮十二時中或見或聞或笑或語
或瞋或喜或是或非種種施爲運轉且道畢竟是誰
能伊麼運轉施爲耶若言色身運轉何故有人一念
命終都未壞爛卽眼不自見耳不能聞鼻不辨香舌
不談論身不動搖手不執捉足不運奔耶是知能見
聞動作必是汝本心不是汝色身也况此色身四大
性空如鏡中像亦如水月豈能了了常知明明不昧
感而遂通恒沙妙用也故云神通并妙用運水及搬

柴且入理多端指汝一門令汝還源汝還聞鴉鳴鵲
噪之聲麼曰聞曰汝返聞汝聞性還有許多聲麼曰
到這裏一切聲一切分別俱不可得曰奇哉奇哉此
是觀音入理之門我更問你你道到這裏一切聲一
切分別總不可得既不可得當伊麼時莫是虛空麼
曰元來不空明明不昧曰作麼生是不空之體曰亦
無相貌言之不可及曰此是諸佛諸祖壽命更莫疑
也既無相貌還有大小麼既無大小還有邊際麼無
邊際故無內外無內外故無遠近無遠近故無彼此
無彼此則無往來無往來則無生死無生死則無古

今無古今則無迷悟無迷悟則無凡聖無凡聖則無染淨無染淨則無是非無是非則一切名言俱不可得既總無如是一切根境一切妄念乃至種種相貌種種名言俱不可得此豈非本來空寂本來無物也然諸法皆空之處靈知不昧不同無情性自神解此是汝空寂靈知清淨心體而此清淨空寂之心是三世諸佛勝淨明心亦是衆生本源覺性悟此而守之者坐一如而不動解脫迷此而背之者往六趣而長劫輪迴故云迷一心而往六趣者去也動也悟法界而復一心者來也靜也雖迷悟之有殊乃本源則一

也所以云言法者謂衆生心而此空寂之心在聖而不增在凡而不減故云在聖智而不耀隱凡心而不昧既不增於聖不少於凡佛祖奚以異於人而所以異於人者能自護心念耳汝若信得及疑情頓息出丈夫之志發真正見解親嘗其味自到自肯之地則是爲修心人解悟處也更無階級次第故云頓也如云於信因中契諸佛果德分毫不殊方成信也問旣悟此理更無階級何假後修漸熏漸成耶答悟後漸修之義前已具說而復疑情未釋不妨重說汝須淨心諦聽諦聽凡夫無始曠大劫來至於今日流轉五

道生來死去堅執我相妄想顛倒無明種習久與成性雖到今生頓悟自性本來空寂與佛無殊而此舊習卒難除斷故逢逆順境瞋喜是非熾然起滅客塵煩惱與前無異若不以般若加功著力焉能對治無明得到大休大歇之地如云頓悟雖同佛多生習氣深風停波尚湧理現念猶侵又杲禪師云往往利根之輩不費多力打發此事便生容易之心更不修治日久月深依前流浪未免輪迴則豈可以一期所悟便撥置後修耶故悟後長須照察妄念忽起都不隨之損之又損以至無爲方始究竟天下善知識悟後

牧牛行是也雖有後修已先頓悟妄念本空心性本
淨於惡斷斷而無斷於善修修而無修此乃真修真
斷矣故云雖備修萬行唯以無念爲宗主圭峰總判先
悟後修之義云頓悟此性元無煩惱無漏智性本自
具足與佛無殊依此而修者是名最上乘禪亦名如
來清淨禪也若能念念修習自然漸得百千三昧達
摩門下展轉相傳者是此禪也則頓悟漸修之義如
車二輪闕一不可或者不知善惡性空堅坐不動捺
伏身心如石壓草以爲修心是大惑矣故云聲聞心
心斷惑能斷之心是賊但諦觀殺盜淫妄從性而起

起卽無起當處便寂何須更斷所以云不怕念起唯
恐覺遲又云念起卽覺覺之卽無故悟人分上雖有
客塵煩惱俱成醍醐但照惑無本空華三界如風卷
煙幻化六塵如湯消冰若能如是念念修習不忘照
顧定慧等持則愛惡自然淡薄悲智自然增明皐業
自然斷除功行自然增進煩惱盡時生死卽絕若微
細流注永斷圓覺大智朗然獨存卽現千百億化身
於十方國中赴感應機似月現九霄影分萬水應用
無窮度有緣衆生快樂無憂名之爲大覺世尊問後
修門中定慧等持之義實未明了更爲宣說委示開

迷引入解脫之門答若設法義入理千門莫非定慧
取其綱要則但自性上體用二義前所謂空寂靈知
是也定是體慧是用也卽體之用故慧不離定卽用
之體故定不離慧定則慧故寂而常知慧則定故知
而常寂如曹溪云心地無亂自性定心地無癡自性
慧若悟如是任運寂知遮炤無二則是爲頓門箇者
雙修定慧也若言先以寂寂治於緣慮後以惺惺治
於昏住先後對治均調昏亂以入於靜者是爲漸門
劣機所行也雖云惺寂等持未免取靜爲行則豈爲
了事人不離本寂本知任運雙修者也故曹溪云自

悟修行不在於靜若定先後卽是迷人則達人分上
定慧等持之義不落功用元自無爲更無特地時節
見色聞聲時但伊麼著衣喫飯時但伊麼屙屎送尿
時但伊麼對人接話時但伊麼乃至行住坐臥或語
或默或喜或怒一切時中一一如是似虛舟駕浪隨
高隨下如流水轉山遇曲遇直而心心無知今日騰
騰任運明日任運騰騰隨順衆緣無障無礙於善於
惡不斷不修質直無僞視聽尋常則絕一塵而作對
何勞遣蕩之功無一念而生情不假忘緣之力然障
濃習重觀劣心浮無明之力大般若之力小於善惡

境界未免被動靜互換心不恬淡者不無忘緣遣蕩
功夫矣如云六根攝境心不隨緣謂之定心境俱空
炤鑑無惑謂之慧此雖隨相門定慧漸門劣機所行
也對治門中不可無也若掉舉熾盛則先以定門稱
理攝散心不隨緣契乎本寂若昏沉尤多則次以慧
門擇法觀空照鑑無惑契乎本知以定治乎亂想以
慧治乎無記動靜相亡對治功終則對境而念念歸
宗遇緣而心心契道任運雙修方爲無事人若如是
則真可謂定慧等持明見佛性者也問據汝所判悟
後修門中定慧等持之義有二種一自性定慧二隨

相定慧自性門則曰任運寂知元自無爲絕一塵而作對何勞遣蕩之功無一念而生情不假忘緣之力判云此是頓門箇者不離自性定慧等持也隨相門則曰稱理攝散擇法觀空均調昏亂以入無爲判云此是漸門劣機所行也就此兩門定慧不無疑焉若言一人所行也爲復先依自性門定慧雙修然後更用隨相門對治之功耶爲復先依隨相門均調昏亂然後以入自性門耶若先依自性定慧則任運寂知更無對治之功何須更取隨相門定慧耶如將皓玉彫文喪德若先以隨相門定慧對治功成然後趣於

自性門則宛是漸門中劣機悟前漸熏也豈云頓門
箇者先悟後修用無功之功也若一時無前後則二
門定慧頓漸有異如何一時竝行也則頓門箇者依
自性門任運亾功漸門劣機趣隨相門對治勞功二
門之機頓漸不同優劣皎然云何先悟後修門中竝
釋二種耶請爲通會令絕疑情答所釋皎然汝自生
疑隨言生解轉生疑惑得意忘言不勞致詰若就兩
門各判所行則修自性定慧者此是頓門用無功之
功竝運雙寂自修自性自成佛道者也修隨相門定
慧者此是未悟前漸門劣機用對治之功心心斷惑

取靜爲行者而此二門所行頓漸各異不可參亂也然悟後修門中兼論隨相門中對治者非全取漸機所行也取其方便假道托宿而已何故於此頓門亦有機勝者亦有機劣者不可一例判其行李也若煩惱淡薄身心輕安於善離善於惡離惡不動八風寂然三受者依自性定慧任運雙修天真無作動靜常禪成就自爲之理何假隨相門對治之義也無病不求藥雖先頓悟煩惱濃厚習氣堅重對境而念念生情遇緣而心心作對被他昏亂使殺昧卻寂知常然者卽借隨相門定慧不忘對治均調昏亂以入無爲

卽其宜矣雖借對治功夫暫調習氣以先頓悟心性
本淨煩惱本空故卽不落漸門劣機汙染修也何者
修在悟前則雖用功不忘念念熏修著著生疑未能
無礙如有一物礙在胷中不安之相常現在前日久
月深對治功熟則身心客塵恰似輕安雖復輕安疑
根未斷如石壓草猶於生死界不得自在故云修在
悟前非真修也悟人分上雖有對治方便念念無疑
不落汙染日久月深自然契合天真妙性任運寂知
念念攀緣一切境心心永斷諸煩惱不離自性定慧
等持成就無上菩提與前機勝更無差別則隨相門

定慧雖是漸機所行於悟人分上可謂點鐵成金若知如是則豈以二門定慧有先後次第二見之疑乎願諸修道之人研味此語更莫狐疑自生退屈若具丈夫之志求無上菩提者捨此奚以哉切莫執文直須了義一一歸就自己契合本宗則無師之智自然現前天真之理了然不昧成就慧身不由他悟而此妙旨雖是諸人分上若非夙植般若種智大乘根器者不能一念而生正信豈徒不信亦乃謗謔返招無間者比比有之雖不信受一經於耳暫時結緣其功厥德不可稱量如唯心訣云聞而不信尙結佛種之

因學而不成猶蓋人天之福不失成佛之正因况聞
而信學而成守護不忘者其功德豈能度量追念過
去輪迴之業不知其幾千劫墮黑闇入無間受種種
苦又不知其幾何而欲求佛道不逢善友長劫沉淪
冥冥無覺造諸惡業時或一思不覺長吁其可放緩
再受前殃又不知誰復使我今值人生爲萬物之靈
不昧修真之路實謂盲龜遇木纖芥投鍼其爲慶幸
曷勝道哉我今若自生退屈或生懈怠而恒常望後
須臾失命退墮惡趣受諸苦痛之時雖欲願聞一句
佛法信解受持欲免辛酸豈可復得乎及到臨危悔

無所益願諸修道之人莫生放逸莫著貪淫如救頭
然不忘照顧無常迅速身如朝露命若西光今日雖
存明亦難保切須在意切須在意且憑世間有爲之
善亦可免三途苦輪於天上人間得殊勝果報受諸
快樂況此最上乘甚深法門暫時生信所成功德不
可以比喻說其小分如經云若人以三千大千世界
七寶布施供養爾所世界衆生皆得充滿又教化爾
所世界一切衆生令得四果其功德無量無邊不如
一食頃正思此法所獲功德是知我此法門最尊最
貴於諸功德比況不及故經云一念淨心是道場勝

造恒沙七寶塔寶塔畢竟碎爲塵一念淨心成正覺
願諸修道之人研味此語切須在意此身不向今生
度更待何生度此身今若不修萬劫差違今若強修
難修之行漸得不難功行自進嗟夫今時人飢逢王
饍不知下口病遇醫王不知服藥不曰如之何如之
何者吾末如之何也已矣且世間有爲之事其狀可
見其功可驗人得一事歎其希有我此心宗無形可
觀無狀可見言語道斷心行處滅故天魔外道毀謗
無門釋梵諸天稱讚不及况凡夫淺識之流其能髣
髴悲夫并鼃焉知滄海之闊野干何能師子之吼故

知末法世中聞此法門生希有想信解受持者已於
無量劫中承事諸聖植諸善根深結般若正因最上
根性也故金剛經云於此章句能生信心者當知已
於無量佛所種諸善根又云爲發大乘者說爲發最
上乘者說願諸求道之人莫生怯弱須發勇猛之心
宿劫善因未可知也若不信殊勝甘爲下劣生艱阻
之想今不修之則縱有宿世善根今斷之故彌在其
難展轉遠矣今旣到寶所不可空手而還一失人身
萬劫難復請須慎之豈有智者知其寶所反不求之
長怨孤貧若欲獲寶放下皮囊

法海寶筏

禪警語 博山無異禪師說

做工夫最初要箇破生死心堅硬看破世界身心悉是假緣無實主宰若不發明本具底大理則生死心不破生死心既不破無常殺鬼念念不停却如何排遣將此一念作個敲門瓦子如坐在烈火焰中求出相似亂行一步不得停止一步不得別生一念不得望別人救不得當恁麼時只須不顧猛火不顧身命不望人救不生別念不肯暫止往前直奔奔得出是好手

做工夫貴在起疑情何謂疑情如生不知何來不得不疑來處死不知何去不得不疑去處生死關竅不破則疑情頓發結在眉睫上放亦不下趁亦不去忽朝撲破疑團生死二字是甚麼閒家具噫

做工夫最怕耽着靜境使人困于枯寂不覺不知動境人多厭靜境人多不厭良以行人一向處乎喧鬧之場一與靜境相應如食飴食蜜如人倦久喜睡安得自知耶

做工夫要中正勁挺不近人情苟循情應對則工夫做不上不但工夫做不上日久月深必隨流俗阿師

無疑也

做工夫人擡頭不見天低頭不見地看山不是山見水不是水行不知行坐不知坐千人萬人之中不見有一人通身內外只是一箇疑團疑團不破誓不休心此爲工夫緊要

做工夫不怕死不得活只怕活不得死果與疑情廝結在一處動境不待遣而自遣妄心不待淨而自淨六根門頭自然虛豁豁地點著卽到呼著卽應何愁不活也

做工夫舉起話頭時要歷歷明明如猫捕鼠相似古

所謂不斬鰲奴誓不休不然則坐在鬼窟裏昏昏沉沉過了一生有何所益

猫捕鼠睜開兩眼四脚撐撐只要拿鼠到口始得縱有鷄犬在傍亦不暇顧叅禪者亦復如是只是憤然要明此理縱八境交錯于前亦不暇顧纔有別念非但鼠兼走却猫兒

做工夫不可在古人公案上卜度妄加解釋縱一一領畧得過與自己沒交涉殊不知古人一語一言如大火聚近之不得觸之不得何況坐臥其中耶更于其中分大分小論上論下不喪身失命者幾希

做工夫人不可尋文逐句記言記語不但無益與工夫作障礙真實工夫返成緣慮欲得心行處絕豈可得乎

做工夫最怕比量將心湊泊與道轉遠做到彌勒下生去管取沒交涉若是疑情頓發的漢子如坐在鐵壁銀山之中只要得個活路不得箇活路如何得安穩去但恁麼做去時節到來自有一箇倒斷

黃檗禪師云塵勞迫脫事非常緊把繩頭做一場不是一翻寒徹骨爭得梅花撲鼻香此語最親切若將此偈時時警策工夫自然得上

江濤集卷之二
做工夫最要緊是個切字切字最有力不切則懈怠
生懈怠生則放逸縱意靡所不至若用心真切放逸
懈怠何繇得生當知切之一字不愁不到古人田地
不愁生死不破

切之一字當下超善惡無記三性用心甚切則不思
善用心甚切則不思惡用心甚切則不落無記話頭
切無掉舉話頭切無昏沉

切之一字是最親切句用心親切則無間隙故魔不
能入用心親切不生計度有無等則不落外道
做工夫最怕思惟做詩做偈做文賦等詩偈成則名

詩僧文賦工則稱文字僧與叅禪總沒交涉凡遇着
逆順境緣動人念處便當覺破提起話頭不隨境緣
轉始得或云不打緊這三個字最是悞人學者不可
不審

做工夫不得將心待悟如人行路住在路上待到家
終不到家只須行到家若將心待悟終不悟只須逼
拶令悟非待悟也

做工夫着不得一絲毫別念行住坐臥單單只提起
本叅話頭發起疑情憤然要討箇下落若有絲毫別
念古所謂雜毒入心傷乎慧命學者不可不謹

余云別念非但世間法除究心之外佛法中一切好事悉名別念又豈但佛法中事於心體上取之捨之執之化之悉別念矣

做工夫做到無可用心處萬仞懸崖處水窮山盡處羅紋結角處如老鼠入牛角自有倒斷也

做工夫最怕一箇伶俐心伶俐心爲之藥忌犯着些毫雖真藥現前不能救耳若真是個叅禪漢眼如盲耳如聾心念纔起時如撞着銀山鐵壁相似如此則工夫始得相應耳

做工夫不可避喧向寂瞑目合眼坐在鬼窟裏作活

計古所謂黑山下坐死水浸濟得甚麼邊事只要在
境緣上做得去始是得力處一句話頭頓起在眉睫
上行裏坐裏着衣吃飯裏迎賓送客裏只要明這一
句話頭落處一朝洗面時摸着鼻孔原來太近
工夫不怕做不上做不上要做上便是工夫做不上
便打退鼓縱百劫千生其奈爾何

疑情發得起放不下便是上路將生死二字貼在額
頭上如猛虎趕來若不直走到家必喪身失命豈可
住脚耶

做工夫只在一則公案上用心不可一切公案上作

法華寶鑑
解會縱能解得終是解非悟也法華經云是法非思量分別之所能解圓覺經云以思惟心測度如來圓覺境界如將螢火焚須彌山終不能得洞山云擬將心意學玄宗大似西行却向東大凡穿鑿公案者須皮下有血識慚愧始得

道不可須臾離可離非道也工夫不可須臾間斷可間斷非工夫也真正叅究人如火燒眉毛上又如救頭然何暇爲他事動念耶古德云如一人與萬人敵覲面那容眨眼看此語做工夫最要不可不知做工夫曉夕不敢自怠如慈明大師夜欲將睡用引

錐刺之又云古人爲道不食不寢予何人耶

做工夫不得向意根下卜度思惟使工夫不得成片不能發得起疑情思惟卜度四字障正信障正行兼障道眼學者於彼如生冤家相似乃可耳

做工夫不得向舉起處承當若承當正所謂瞞預儻侗與叅究不相應只須發起疑情打教徹無承當處亦無承當者如空中樓閣七通八達不然認賊爲子認奴作郎古德云莫將驢鞍橋喚作阿爺下領斯之謂也

做工夫不得求人說破若說破終是別人底與自己

沒相干如人問路到長安但可指路不可更問長安
事彼一一說明長安事終是彼見底非問路者親見
也若不力行便求人說破亦復如是

做工夫不只是念公案念來念去有甚麼交涉念到
彌勒下生時亦沒交涉何不念阿彌陀佛更有利益
不但教不必念不妨一一舉起話頭如看無字便就
無上起疑情如看栢樹子便就栢樹子起疑情如看
一歸何處便就一歸何處起疑情疑情發得起盡十
方世界是一箇疑團不知有父母身心不知有十方
世界非內非外輒成一團一日如桶箍自爆再見善

知識不待開口而大事了畢矣

做工夫不可須臾失正念若失了叅究一念必流入
異端茫茫不返如有人靜坐只喜澄澄湛湛純清絕
點爲佛事此喚作失正念墮在澄湛中或認箇能講
能譚能動能靜爲佛事此喚作失正念認識神或將
妄心遏捺令妄心不起爲佛事此喚作失正念如石
壓草又如剝芭蕉葉子或觀想身如虛空不起念如
牆壁此喚作失正念落空亾外道魂不散底死人總
而言之皆失正念故

做工夫疑情發得起更要撲得破若撲不破時當確

實正念發大勇猛切中更加個切字始得徑山云大丈夫漢決欲究竟此一段大事因緣一等打破面皮性燥豎起脊梁骨莫順人情把自平昔所疑處貼在額頭上常時一似欠人萬百貫錢被人追索無物可償怕被人恥辱無急得急無忙得忙無大得大底一件事方有趣向分

信士德雲居士法界心施貲印此
法海寶筏恭爲

先考庚辰生密陽朴枝興
先妣甲午生潭陽田氏 仗此勝緣往生極

樂卽證菩提之願
光緒癸未七月 日甘露社識

法海寶筏 終





